

# SAN MARCOS

## Marcosa Jesucristoen huadak hua'a o'manigmadoya'uyate.

**Sue'da aratbut e'nahue'yo Juan Bautistaa Diosen huadak hua'a o'mana'onhuahua'uyate.**

*(Mt. 3.1-12; Lc. 3.1-9, 15-17; Jn. 1.19-28)*

**1** <sup>1</sup>Jesucristoen huadak hua'a huaboa'da on'nigmadoya'ne. Jesucristo Diosen Huasi'po o'e.

<sup>2</sup>A'nennada Isaías Diosen huamanbatia'pakeria o'madoya'uyate:

Ontaj oknopog'dik ka'ne'po onte huakkuruda do'hued huata'moneritaj ijta'mona'apoy sion. Diosa ona'uyate. <sup>3</sup>Sue'da aratbut e'nahue'yo o'ika'apo. "Yan'nopo'korea'. Huairi e'tiakde'te daka'da a'eya'po 'urunopo'da yag'kika'. Dakhuea' e'kika' yan'batikpo onte'ti Diostaj yan'nigpeika'." 'Utta'da o'mana'apo.

Kenda o'madoya'uyate Isaíasa. Juan Bautistataj o'timadoya'uyate.

<sup>4</sup>Ken sue'da aratbut e'nahue'yo Juana bautiza o'magkika'po, "Diosa dakhuea' e'ka' kakkahue'po yan'nopo'korea' Diostaj bautiza megke'." Juana aratbuttaj o'manika'uyate.

<sup>5</sup>Juantaj e'peeta' on'pakpo huakka'nanada aratbut

on'huahua'uyate. Huakka' Judea huadari huag'eri huakka' Jerusalényo huag'eriere Juantaj on'huahua'uyate. "Dakhuea'da ijikikamey. Bekkahuea' Dios." Enade'te Jordánhueya' Juana bautiza o'magka'uyate.

<sup>6</sup>Yudtaj camello huahujtaj e'ka' Juan Bautista o'otika'po kenpa'ti huasi'dak baka'bij o'tae'uyate. Tiktik o'bakpa'uyate. Asigku o'minika'uyate. <sup>7</sup>O'mana'po:

—A'ti Diosen Huairi bo'huatiakdeapone. Do'hua e'manikade'te bo'huatiakapone. Kennayo huakhuairinada teynanada e'eada do'huataj ehue'da ijje. Huairinada o'enok ke'nen huanaba' ehue'dikda ijje. <sup>8</sup>Hue'eya opudtaj bautiza o'nogka'ne. Ke'nanayo Diosen Nokirega' bautiza mogka'apone. —Juan Bautista o'mana'uyate.

**Jesústaj bautiza ogka'uyate.**

*(Mt. 3.13-17; Lc. 3.21-22)*

<sup>9</sup>Kenoka' Galilea huadaribaya' Nazaret huakka' jakya' Jesús o'tiakuyate, Jordánhueya' Juana bautiza ogka'uyate. <sup>10</sup>Jesús huahueya' e'behuikde'te ida kurud konig akbogpe okhuikepo, Diosen Nokirega' daka'damon konig tukku'

o'huahuarakpo Jesústaj o'tikot  
Jesúsa Diosen Nokiręgtaj e'tiahuayte  
o'tikotpo:

<sup>11</sup>—On do'hued huasi'po o'taęne.  
Huadi'da o'taęne. Ontaj durugda  
o'toęne. —Kurudyá' Diosa ona'uyate.

**Jesústaj toto'a o'dikdikuyate.**

(Mt. 4.1-11; Lc. 4.1-13)

<sup>12</sup>Ken sue'da aratbut e'nahue'yo Dios  
Nokiręga Jesústaj o'ta'mona'uyate.

<sup>13</sup>Ken, sue'da aratbut e'nahue'yo  
cuarenta huame'noe o'eonhua'po  
dubayo huą'erięre o'nepo. Toto'  
huairia Jesústaj o'dikdikuyate  
dakhuea' kake'po. E'dikdikde'te Diosen  
huata'moneri aypo on'yokuyate.

**Galileayo huaboa'da huadak hua'a**

**Jesúsa o'manmadika'uyate.**

(Mt. 4.12-17; Lc. 4.14-15)

<sup>14</sup>Ken Herodes huairia Juantaj  
huabakudá' jakyo e'kudade'te, Galilea  
huadariyo Jesús o'hua'uyate. Dios  
Huairitaj huadak hua'a huaboa'da  
o'manmadika'uyate.

<sup>15</sup>—Oyedda Dios huairi o'tiakdenok,  
dakhuea' bokika'nig yan'nopo'korea',  
Diosen huamanopoyarea'eritaj  
yanoknopojika'. —Jesúsa  
o'manika'uyate.

**Botta' botta' huakjene'eritaj: "Doere**

**monhua'." Jesúsa o'mana'uyate.**

(Mt. 4.18-22; Lc. 5.1-11)

<sup>16</sup>Jesús huaboro' e'pog  
Galilea akta'bogpete o'hua'epo  
Simón huama'buy Andréstere  
o'batiahuay'uyate. O'nokjene'uyate.  
Huakjene'eri o'ne'uy. E'nokjene'te  
o'batiahuay'uyate.

<sup>17</sup>—Doere monhua'. Aratbut  
Diosensi'po ka'nike'po  
kan'manopo'kore'po  
mo'manmadikika'apone. —Jesúsa  
o'mana'uyate.

<sup>18</sup>Idada huakjene' kenpa'da  
o'nenanpo Jesúsere on'hua'uyate.

<sup>19</sup>Adyonda o'hua'edepo Jacobotaj  
huama'buy Juantere Jesús  
o'batiahuay'uyate. Jacobo huama'buyere  
Zebedeoen huasi'po o'nuyate.  
Kusi'petone'yo o'nepo huakjene'taj  
on'to'ka'po, <sup>20</sup>“Monhua', do'taj  
me'nigpejika'.” Jesús e'manade'te huaoj  
Zebedeo huanaba'tere o'nenonpo Jesústaj  
a'nigpejikaya'po on'tahua'uyate.

**Dakhue' nokiręga huabokerektaj**

**o'nopo'toę'uyate.**

(Lc. 4.31-37)

<sup>21</sup>Ken Capernaum huakka' jakyo  
o'nokye'uyate. Okmapię'ahuaddik  
huame'noete judío aratbuten huaitake'  
jakyo Jesús o'kuddepo, o'manmadika'uyate.

<sup>22</sup>Moisésenba' huamanmadika'eri konig  
huairi daka' manmadikahue' o'nika'nig'a  
Jesúsnayo konig huairitone' 'urua'nanada  
o'manmadika'uyatenok, “kenpihuay”  
aratbut ođa'po on'mepuke'uyate. <sup>23</sup>Judíoęn  
huaitake' jakyo dakhue' nokiręga  
huabokerektaj o'nopo'toęnok 'utta'da  
ona'po:

<sup>24</sup>—Mena'po oro'taj dakhuea' egka'ta'  
i'pak Jesús Nazaret huą'eri. Mena'po  
oro'taj a'maenya'po o'huatiak. Ontaj  
okia'ne Diosen huadakda nogsi'potida  
i'ęne. O'nopoęy. —Kenbokereka  
Jesústaj 'utta'da ona'uyate.

<sup>25</sup>—A'pakhue' yaę'. Huabokerektaj  
yakorok, nokiręg. —Jesúsa ona'uyate.

<sup>26</sup>Nokiręga o'iriga'po o'sagkia'depo  
okhua'uyate.

<sup>27</sup>Aya'ada on'tiahuaypo,  
—Kenpihuay on'nopoępo  
'urua'nanada o'manmadika'. Konig  
huairitone' ighua'da o'mana'nok  
dakhue' nokiręg on'nigpeępo o'nokorok.  
—Huayahuaya on'batia'pakuyate.

<sup>28</sup>Idada Galilea huadaribayo  
nogyo nogyo Jesús a'urua'da o'kika'  
on'manbatia'pakika'uyate.

**Simón Pedroen huasu'taj  
o'yaread'uy Jesúsa.**

(Mt. 8.14-15; Lc. 4.38-39)

<sup>29</sup>Ken judíoen huaitake' jakya' o'norokdepo Jesús Simónen Andrésenere jakyo Jacobo Juanere o'hua'uy. <sup>30</sup>Simónen huasu' o'digpakpo, onpahueduyate. "Simónen huasu' o'digpak." Jesústaj o'nona'nok. <sup>31</sup>Jesús Simónen huasu'taj o'huahua'po, o'ta'kuypo o'boda'uyate. E'digpak o'ta'huitato'po aypo o'manigmanhuada'uy.

**Huakka' aratbut dakhue'da e'ne'te  
Jesúsa o'bayarea'uyate.**

(Mt. 8.16-17; Lc. 4.40-41)

<sup>32</sup>E'sikde'te huakka'da dakhue' o'nenok aya'tada Jesúste on'batohua'uy. Nogomeytaj dakhue' nokirega on'manopo'toenok Jesústaj on'batohua'uy. <sup>33</sup>Huakka' jakya' aya'ada akbogpete on'kupopakuy. <sup>34</sup>Huakka'tada Jesúsa o'bayarea'uy. Huakka' toto'taj o'maken'uy. Toto' Jesústaj okia'nok "Diosen Cristo o'e ahue' yane'." Jesúsa toto'taj o'mana'uyate.

**Galilea huadaribaya' Jesúsa  
o'manbatia'pakonhuahua'uyate.**

(Lc. 4.42-44)

<sup>35</sup>Ken, meahuedda o'mabo'uyate. Sue'da aratbut e'nahue'yo Jesús o'hua'uyate. Keya' Diostaj o'tiona'pakuyate. <sup>36</sup>Simónomey on'tahua'po, <sup>37</sup>on'huahuydepo, —Aya'ada bo'ukne. —O'nona'uyate. <sup>38</sup>—Nog huakka' jakyo nogyo nogyo huadak hua'a a'manbatia'pakya'po ijtiakpo nogyo nogyo monhua'. —Jesúsa o'mana'uyate. <sup>39</sup>Galilea huadaribayo nogyo nogyo o'hua'unhuahua'po judío aratbuten huaitake' jakyo o'manmadikika'po

kenpa'ti toto' nokiregtaj o'maenika'uyate.

**Huabokerek ke'poda e'so'settaj  
Jesúsa o'yarea'uyate.**

(Mt. 8.1-4; Lc. 5.12-16)

<sup>40</sup>Huabokerek ke'poda o'so'setpo, Jesústaj o'huatiakuyate. Huikudate o'tihuadpo, —E'paknayo yarea'dik o'ene. —Jesústaj ona'nok. <sup>41</sup>Jesús o'tinepahuiudpo, o'tibata'tepo, ona'po: —E'yarea'ta' o'pakne. O'yareapone. —Ona'uyate.

<sup>42</sup>Ena'te idada o'yaread'uyate. 'Uruda huaso' o'uyate.

<sup>43</sup>Jesúsa o'ta'mona'po,

<sup>44</sup>—Keyoj, Jesúsa be'yarea'ne mantia'pakhue' yae'. Huaso' e'yarea' ka'tiahuaye'po sacerdotete yahuati'. A'yareya'po konig Moisésa o'mana'uyatenig ken konig yayokti'. 'Uhuapi' yayokti'. O'yarede aratbuta mo'tinopoepone. —Jesúsa ighua'da ona'uyate.

<sup>45</sup>Ke'nanayo o'hua'po Jesúsa be'yarea'ne aya'tada huabo'ada o'mantia'pak'uyate. Konigepo Jesús huakka' jak eretnopoyo mankuhue'dik o'epo sue'da aratbut e'nahue'yo o'ika'uy. Nogyá' nogyá' on'bahuatiakika'uyate.

**Huabokerek e'ketpaktaj Jesúsa  
o'yarea'uyate.**

(Mt. 9.1-8; Lc. 5.17-26)

**2** <sup>1</sup>Sue'da huame'noe e'pokde'te Capernaum huakka' jakyo onte'ti Jesús e'tiakde'te "Jesús jakyo o'e." Huakka' jak huae'eria on'tipepo, <sup>2</sup>huakka'ada aratbut on'kupopakpo, jakyo ogkupopakpo kurutekon ogkupopakuyate. Akbogpete mente boahue' o'ne'uyate. Apag Diosen huadak hua'a Jesúsa o'manmadika'uyate. <sup>3</sup>Botta' botta'

huabokereka huabokerek e'ketpaktaj o'nonokba'huadonpo on'totiakyate.

<sup>4</sup>Huakka'ada ogkupopaknok, menpa' ibodte huatotiakhue'dik o'nepo, jak kutayo on'tobehuikepo jakonpid on'tiokendepo huabokerek e'ketpak asukte enpahuedte aratbutnopote Jesústaj huakokpen o'nonhuaraka'uyate. <sup>5</sup>Jesúsa o'yarea'apo o'noknopoenok Jesúsa o'nopoepo,

—Aya' Diostaj dakhuea' i'kika'uyatenig'a yokkahuea'po o'nopo'tihueke'ne, sion. —Huabokerek e'ketpaktaj Jesúsa ona'uyate.

<sup>6-7</sup>Kenteyo sue'da Moisésenba' huamanmadika'eri on'bahuadpo, "Menpa' in huabokerek Diostaj dakhuea' oa'. Be'a dakhuea' e'ka' ya'nopo'tihueke'. Diosayo'da nopo'tihueke'dik o'e."

Kenda huanopoya'da on'nopo'e'uyate.

<sup>8</sup>Kenda Moisésenba' huamanmadika'eri huanopoya'da on'nopoenigtaj Jesúsa o'nopoepo,

—Mena'po huanopoya' kenpa' do'taj on'tinopo'e. <sup>9</sup>Diostaj dakhuea' e'ka' huabokereka okkahueahue'dik o'e. Diosayo'da okkahuea'dik o'e. Huabokerekanayo yareahue'dik o'epo, "Yabod, atisuk yatohua' yahuati,"

onahue'dik o'e. Diosayo'da yarea'dik o'e.

<sup>10</sup>Do huabokerek ijjepe Diosya' ijtiakuy. Diostaj dakhuea' e'ka' nopo'tihueke'dik ijjepe opudtaj a'manopo'e'aya'po, e'ketpaktaj ijyareapoy. —Jesúsa Moisésenba' huamanmadika'eritaj o'mana'po,

<sup>11</sup>—Yabo', asuk yatopepo, o'nen jakyo yahuati' ona'ne. —Jesúsa e'ketpaktaj ona'uyate.

<sup>12</sup>Aya'ada en'tiahuayte o'bodpo asuk o'udpo o'makorokon'uyate. Konigepo aya'ada,

—Kenpihuay, Dios huadakda o'e. 'Urunanada o'ka'. Ken konig a'nenda tiahuayhue' o'nika'uynig o'tiahuaydey.

—Aratbuta on'tiahuaydepo on'batia'pakuy.

**Jesúsa Mateotaj "menigpeepo beta'hua'," ona'uyate.**

(Mt. 9.9-13; Lc. 5.27-32)

<sup>13</sup>Ken onte'ti Jesús o'hua'po, e'pog akta'bogpete o'hua'uyate. Huakka'ada aratbut kentaj egkupopakde'te o'manmadikanhua'uyate. <sup>14</sup>O'pokonpo, Levítaj o'tiahuay'uyate. (Leví Mateo botta'dik on'dikka'uyate.) Leví Alfeoen huasi'po gobiernoen huakupe huatabae' jakyo o'huaduyate,

—Menigpeepo beta'hua'. —Levítaj ona'uyatenok Leví o'bodpo, Jesúsere o'hua'uyate.

<sup>15</sup>Ken Levíen jakyo Jesúsere huakka'mon on'bape'po huakka' gobiernoen huakupe huatabae'eri huakka' dakhuea' huaka'erikon on'bape'uyate. Huakka'da ken konig Jesústaj on'tahua'ika'uyate.

<sup>16</sup>Dakhuea' huaka'eriere, Jesús o'bape' Moisésenba' huamanmadika'eri fariseoere on'tiahuaydepo,

—¿Mena'po huakupe huatabae'eri dakhuea' huaka'eriere o'bape'po Jesús? —Fariseoa Jesúsén huanigpeika'eritaj on'huaa'uyate.

<sup>17</sup>Kenda Jesúsa o'mape'edepo,

—Aratbut dakda ee'nayo huamadakka'eritaj pakhue' o'nika'. Dakhue'da ee'nayo huamadakka'eritaj on'pakika'. Huadak huakika'eritaj "yan'nopo'korea'," a'manaya'po tiakhue' ijje'uy. "Yan'nopo'korea'po do'taj men'nigpeika'." Dakhuea' huaka'eritaj e'mana'ta' ijpakpo ijtiakuy. —Jesúsa o'mana'uyate.

**"¿Mena'po o'nen huanigpeika'eria Dios kamape'e'po aypo bapehue' ehue' yanika'?" Jesústaj o'nona'uyate.**

(Mt. 9.14-17; Lc. 5.33-39)

<sup>18</sup>Nogok Juanen huanigpeika'eria Dios kamape'e'po aypo bapehue'

e'nika'te, fariseo aratbutkon Dios kamape'e'po bapehue' e'nika'te sue'da aratbut Jesústaj on'huatiakpo,

—Juanen huanigpeika'eri fariseokon Dios kamape'e'po bapehue' o'nika'. ¿O'nen huanigpeika'erinayo mena'po yan'papika'? —O'nona'uyate.

<sup>19</sup>—Huabokerek o'toepakapo, ke'nen huadi'a fiestate on'tiakdepo on'papika'. Ken huabokerekere e'ne'te huadi'a papika'dik o'nika'. <sup>20</sup>Nogok ken huabokerektaj en'baktohuade'te huadi'a pai'da e'dik o'nepo Dios kamape'e'po bapehue' o'nika'apo. —Jesúsa o'mana'uyate.

<sup>21</sup>—Huatone'ok ke'poda e'para'te akbetya'po huabo huaoktaj okteghue' o'ika'ne oro'omey aratbut. Huaboenpa huatone'oktaj ekbetnayo onte'ti ke'poda o'para'apo kenpa'ti huabo huaok dakhue'da o'e'apo. Konigti adhuae'pane'a e'manmadika' huatone'dik onte'ti nigpeehue'dik yane'. Do'hued huabodikyo'da e'manmadika' nigpeedik yanika'. Konigti konig adhuae'pane' ogkika'wynig nogiti kika'dik manahue' ijje'po huabo e'manmadikayo'da on'madika'ika'ne. <sup>22</sup>Huatone'si'dak vino huato'e' ayda kenpa'ti hurugada o'epo konigepo huabo vino sine' huebiahued onjoyhue'dik o'ene. Huatone'si'dakyo huabo vino onjoyhue'dik o'ika'ne. Huatone'si'dakyo huabo vino enjoinayo o'huepoagpo huasi'dak on'titagonapo. Vino o'surukapo kenpa'ti huasi'dak ke'poda o'su'huitonapo, dakhue'da o'e'apo. Huabo vino huabosi'dakyo onjoydik o'ene. Huasi'dak vinoere huadak o'e'apo. Konigti adhuae'pane' ogkika'nig kahue'dik yanika'. Do'hued huabo e'manmadikayo'da yan'nigpeika'po yag'kika'. Konigti konig adhuae'pane' ogkika'wynig nogiti kika'dik manahue' ijje'po huabo e'manmadikayo'da on'madikika'ne. —Jesúsa o'mana'uyate.

**Judíoen okmapie'ahuaddik huame'noete Jesúsen huanigpeika'eria o'nogkupoktega'uyate.**  
(Mt. 12.1-8; Lc. 6.1-5)

<sup>23</sup>Nogok okmapie'ahuaddik huame'noete ta'bayo Jesús o'hua'epo huanigpeika'eriere o'huae'uyate. Jesúsen huanigpeika'eria ogkusitokpo trigo o'nogkupaya'uyate.

<sup>24</sup>—Yatiahuay'. ¿Judíoen okmapie'ahuaddik huame'noete ogkupayahue'dik o'enig'a mena'po o'nen huanigpeika'eria yagka'? Dakhue'da ogka'. —Fariseoa Jesústaj o'nona'uyate.

<sup>25</sup>—A'nennada David kenere huae'eri aypotaj o'nepo ogkusitokuyate. <sup>26</sup>Diosen carpa jakyo on'kudonpo, Abiatar sacerdote huairi e'ika'te Diostaj e'nighueda' pan on'tabapeduyate. Kenda pan be'api' bapehue'dik ee'tada ogka'uyate. Sacerdoteyo'da bape'dik o'nyuate. Menpa' kenda Apagba'te tiahuayhue' o'ika'.

<sup>27</sup>Huabokerektehuapa' okmapie'ahuaddik ka'nike'po Diosa okmapie'ahuaddik huame'noe o'dikka'uyate. Huabokereka katepi' nogda nogda kikhue'dik yanika' a'manaya'po okmapie'ahuaddik huame'noe Diosa dikkahue' o'uyate. <sup>28</sup>Do huabokerek ijje'po Diosya' ijtiauky. Okmapie'ahuaddik huame'noe Huairi ijje'y. —Fariseotaj Jesúsa o'mana'uyate.

**Jesúsa eba'po'ketpaktaj o'ba'yarea'uyate.**  
(Mt. 12.9-14; Lc. 6.6-11)

**3** <sup>1</sup>Onte'ti okmapie'ahuaddik huame'noete judíoen huaitake' jakyo Jesúsa o'kuduyate. Keyo huabokerek eba'po'ketpak o'uyate. <sup>2</sup>“¿Okmapie'ahuaddik huame'noete menpa' Jesúsa ya'yareapo?” Fariseo

on'nopoꝑo, e'yarea'nayo, "Jesúsa dakhuea' o'ka'." Huaa'dik o'ey on'nopoꝑ'uyate. Konigepo fariseo Jesústaj on'tiahuaya'uyate.

<sup>3</sup>—Yabo', iyo eretnopoyo yaboato'. —Jesúsa eba'po'ketpaktaj ona'uyate.

<sup>4</sup>—¿Okmapie'ahuaddik huame'noete menpa' huadak ka'dik ya'ne? ¿Menpa' dakhuea' ka'dik ya'ne? ¿Menpa' yarea'dik ya'ne? ¿Menpa' aradik ya'ne? —Jesúsa o'mana'nig'a. Fariseomeya' sohuata' a'tokhue'da o'noke'uyate. <sup>5</sup>E'noopenka'ta' pakhue' o'nenok Jesúsa o'bahuadiayonpo suhue'da o'epo nogta nogta o'batiahuaypo,

—Yabate'. —Jesúsa ona'uyate.

Ken o'ba'tepo o'ba'yarud'uyate.

<sup>6</sup>Fariseomey o'norokpo ida Herodestaj huapakierie ogkupopakdepo, menpa' Jesústaj aradik o'e, on'batia'pakuyate.

**E'pog akta'bogpete Jesústaj huakka'da ogkupopakuyate.**

<sup>7</sup>Huaboro' e'pog akta'bogpeyo Jesús huanigpeika'erie on'hua'uyate. Huakka' Galilea huadaribaya' hua'e'erikon on'tahua'uyate. <sup>8</sup>Judeaya' Jerusalénya' Idumea huadariya' Jordánhue adpenya' Tiro huakka' jakya' Sidón huakka' jakya' huakka'da on'huatiakpo, Jesúsa 'urunanada o'kika' on'tipeꝑdepo, on'tiakuyate. <sup>9-10</sup>Huakka'tada o'bayareadunok aya'ada dakhue' hua'e'eria a'yareya'po ken'taj e'nejta' on'pakpo diga'da on'kupopakpo Jesúso'taj sapajdikte e'nenok,

—Ibodteda kusi'pe mo'nigtoe'.

—Jesúsa huanigpeika'eritaj o'mana'uyate.

<sup>11</sup>Kenoka' toto'a huanopo'toe'eria Jesústaj on'tiahuaydepo on'tihueꝑpo,

—Diosen Huasi'po i'ene. —'Utta'da o'nona'uyate.

<sup>12</sup>—Keje' matiokiahue' yane'.

—Ighua'da o'mana'uyate Jesúsa.

**Jesúsa docetaj huamata'mona' o'baktie'ea'uyate.**

(Mt. 10.1-4; Lc. 6.12-16)

<sup>13</sup>Ote'yo o'behuikuyate. Kenomeytaj e'baktie'ea'ta' o'pakpo "Yan'tiak," o'mana'nok on'huatiakuyate.

<sup>14</sup>Jesúsere ka'nike'po huadak hua'a kan'manmadikike'po docetaj o'baktie'ea'uyate. <sup>15</sup>"Do ijpaknok dakhue' ee' bayarea'dik mo'eapo kenpa'ti dakhue' nokiregtaj maoroka'dik mo'eapone." O'mana'uyate.

<sup>16</sup>Jesúsen doce huamata'moneri o'nepo: Simón Pedro, <sup>17</sup>Jacobo, Jacoboen huama'buy Juan Zebedeoen huasi'po, kenomeytaj o'dikka' Boanerges (kurud ea'ensi'po), <sup>18</sup>Andrés, Felipe, Bartolomé, Mateo, Tomás, Jacobo Alfeoen huasi'po, Tadeo, Simón cananista huakupakeri, <sup>19</sup>kenpa'ti Judas Iscariote Jesúsén huamata'moneri o'nyuate. Judas Iscariote huakupete Jesústaj kanarake'po ya'bahuatitotiakapet.

**"Toto' huairia Jesústaj o'teyya'."**

**Fariseo huamanmadika'eria nama'da on'huaa'uyate.**

(Mt. 12.22-32; Lc. 11.14-23; 12.10)

Nogok huanigpeika'eri Jesúsere jakyo on'kuduyate. <sup>20</sup>Onte'ti huakka'da aratbut ogkupopaknok menpa' bapehue'dik o'ne'uyate. <sup>21</sup>"O'segpakpo o'kika'." Aratbuta on'batia'paknok Jesúsén huabeta kenda on'nopoꝑdepo a'tohuaya'po on'huatiakuyate.

<sup>22</sup>—Beelzebú toto' huairi o'nopo'toꝑo o'teyya'nok Jesúsa toto' nokiregtaj o'makenika'. —Moisésenba' huamanmadika'eria on'batia'pakuy. Jerusalénya' on'tiakde'uyate.

<sup>23</sup>"Nama'da on'nopoꝑen Moisésenba' huamanmadika'eritaj a'manopoꝑaya'po menhuatiakpo men'pee'," Jesúsa o'mana'depo konig o'e o'manbatia'pakpo:

—Menpa' toto'a huata' toto'taj en'dik ya'et. Ehue', enhue'dik o'e.  
<sup>24</sup>Ondariyoyo' huag'e'ri gobierno huairi huayahuaya e'barakikana'yo gobierno huairi to'ehue'dik o'neapo. <sup>25</sup>Kenpa'ti onyoyo' huag'e'ri e'batuktukta' on'pakpo on'bakkupopak. E'baraknayo ehue'dikda o'ne. <sup>26</sup>Konigti toto' huairi huayahuaya e'magka'nayo a'ti ehue'dik ya'neapet.

<sup>27</sup>Huabokereka huairien e'tamaika' jekbakayta' e'paknayo ba'tinuku'dik kenpa'ti itakpi'tinuku'dik o'e. Huairitaj o'tinukudepo okbakaydik o'e. Donayo teyda ijje'y. Toto' huairitaj tinuku'dik ijje'y. Toto' huairien huanaba' maendik ijje'y.

<sup>28</sup>Aratbut dakhuea'da eka'nayo kenpa'ti Diostaj dakhuea'da e'huaa'nayo nopo'tihueke'dik o'e Diosa. <sup>29</sup>Diosen Nokiregtanayo dakhuea'da e'huaa'nayo Diosa bakkahueahue'dik o'e. Menokapi' bokkahueahue' o'eapo Diosa. Diosen Nokiregtaj dakhuea'da o'huaa'uyate Diosa okkahuehue' o'unhuahuika'apo. Buttida ijjay. —Jesusa o'mana'uyate.

<sup>30</sup>“Dakhuea' nokirega' Jesustaj o'nopo'toe.” Moisesenba' huamanmadika'eria nama'da on'huaa'nok Jesusa kenpa' o'mana'uyate.

**Jesúsen huayę Jesúsen huama'buyere on'huatiakuyate.**  
*(Mt. 12.46-50; Lc. 8.19-21)*

<sup>31</sup>Kenoka' huayę Jesúsen huama'buyere on'huatiakuyng'a huakka'nada ogkupopaknok bidtemon on'boato'po “bo'huatiakne. Yana'” ona'nok <sup>32</sup>huakka'da aratbut on'tikupohuadpo,

—O'nen huayę o'nen huama'buyere aratbuttiokpeyon mo'nigbone. On'taj bo'ukne. —O'nona'uyate.

<sup>33</sup>—Be do'hued huayę ya'et. Do'hued huama'buy be ya'net.

—Jesusa o'mana'po, <sup>34</sup>kenomey en'tikupohuadtaj o'tiokpokubere'po,

—Inomey do'hued huayę do'hued huama'buy o'ne. <sup>35</sup>Kenda Dios o'paknok aya'ada ogkika'po do'hued huama'buy do'hued huaidpo do'hued huayę o'ne. —Jesusa o'mana'uyate.

**Huabakidena'eri a'manopoeyaya'po o'manbatia'pakuyate.**

*(Mt. 13.1-9; Lc. 8.4-8)*

**4** <sup>1</sup>Onte'ti huaboa'da Jesusa o'manmadika'po e'pog akta'bogpete o'manmadika'uyate. Huakka'ada aratbut ogkupopaknok kusi'pe e'betyo o'huadato'po huakka' aratbutnayo akta'bogpete ogkupopakuyate. <sup>2</sup>Konig Diosen Huairitaj yanoknopoeapet a'manopoeyaya'po o'manbatia'pakonhua'po o'manmadika'po nogda nogda o'manbatia'pakpo o'manmadika'po, <sup>3</sup>—Yan'pee': Huabakidena'eri a'bakidenaya'po o'hua'uyate. <sup>4</sup>Nogyon nogyon o'bakidena'po sue'da dagte o'kidbakotapo, bakoy o'batiakpo o'kidye'kea'uyate. <sup>5</sup>Sorok buruj huidbate sue'da o'kidbakotuyate. Kenta'idada o'kereky. Sorok buruj o'epo idada o'kereky. <sup>6</sup>Ken diga' o'ta'tedepo eyya' o'pakpo sue'da hua'ihuit o'epo o'ay'uy. <sup>7</sup>Nog huakid okpota'pidsi'bayo o'kidbakotea'po sue'da o'batipakbonig'a okpota'pidsi' diga' o'bakerekpo huakpitaj o'batibuk'uyate. <sup>8</sup>Nog huakid huadak sorokteda o'kidbakotea'uyate. O'batipakbodepo o'bakerekdepo huakka'kidada ogkupahuad'uyate. Noga huakpia treinta huakid ogkupa'epo noga huakpia sesenta huakid ogkupa'epo nogda cien huakid ogkupa'epo. —Jesusa kenda o'manbatia'pakdepo, <sup>9</sup>—Be'api' e'nopo'eta' e'paknayo daka' yan'pee'. Bo'peokhuadne. —Jesusa o'mana'uyate.

**Huakka'ada nopoekahue'dik  
ka'ne'po Dios Huairi konig  
o'e, Jesúsá o'manbatia'pakpo  
o'manmadikika'uyate.**  
(Mt. 13.10-17; Lc. 8.9-10)

<sup>10</sup> Huakka'ada aratbut en'bakhuađe'te  
Jesúsén huanigpeika'eri doce  
huanigpeika'erierye'oda o'nepo,  
"Ken huabakidena'eri ken konig o'e  
huaboa'da on'manbatia'paknigtaj  
nopogkahue' o'ey. Oro'taj daka'  
mo'nopoəa'." Jesúsaj o'nona'uyate.

<sup>11</sup> —Dios huairitaj konig aratbuta  
yan'nigpeika'apet upudtanayo daka'  
e'manopoəa'ta' ijpaki. Nogomeytaj  
e'manopoəa'ta' pakhue' ijjepe  
ken konig o'e ijmanbatia'pakikay.

<sup>12</sup> En'tiahuayada daka' tiahuayhue'  
o'neapo. En'peeada nopogkahue'  
o'neapo. Nopo'koreahue' ka'ne'po Diosa  
bakkahueahue'dik kamagke'po Dios  
Huairi konig o'e ijmanbatia'pakikay.  
—Jesúsá o'mana'uyate.

**Huabakidena'eri konig  
o'e kan'nopoenke'po Jesúsá  
huanigpeika'eritaj daka'  
o'manopoəa'uyate.**  
(Mt. 13.18-23; Lc. 8.11-15)

<sup>13</sup> —Huabakidena'eri konig o'e  
nopogkahue ee'nayo nogdakon  
e'manbatia'paknayo menpa'  
nopogka'dik mo'eapet. <sup>14</sup> Ken huakid  
huabakidena'eri o'bakidenea'nig  
Diosen huadak hua'a o'e. <sup>15</sup> Kenda  
huakid dagte o'kidbakot konig aratbuta  
Diosen huadak hua'a on'peeato'nig'a  
idada toto'a huahua' huanopoya'  
Diosen hua'ataj o'bakkaynok kenpa'da  
o'noknopoəbatikapo. <sup>16</sup> Huakid  
huibayo on'kidbakot konig aratbuta  
Diosen huadak hua'ataj durugda  
on'peeato'nig'a. <sup>17</sup> Konig sigda hua'ihuit  
huadak hua'a sigda o'noknopoədedo  
daka' nigpeonhuahued o'nepo

on'nigpeeato'nig'a. Nogok Diosen  
huadak hua'a huaknopo'e'eri o'nenok  
aratbut on'batieriknok kenpa'ti castiga  
on'magka'nok ida o'noknopoəbatikapo.  
<sup>18</sup> Nog okpota'pidsi'bayo o'kidbakot.  
Ken konig aratbuta huadak hua'a  
on'peepe on'peenig'a. <sup>19</sup> Nogok nogta'  
nogta' on'mamepuke'po kenpa'ti katepi'  
on'tiahuayika'nigtaj nogiti nogiti  
on'pakpo huakka' e'mato'e'ta' on'pakpo,  
huakka' e'mato'e'nayo durugda  
ijjeapoy nama'da on'nopoenig'a  
nogta' nogta' on'eretpakpo onte'ti  
Diosen kahue' o'nika'apo. Sigda  
sigda Diostaj o'noknopoəbatikapo.  
<sup>20</sup> Huakid huadak sorokyo o'kidbakot  
konig aratbut huadaknopo'da huadak  
hua'a daka' on'nigpeeonhuahuika'po  
Diosen batikhue'da huadakda  
ogkadhuahuika'po Diosensi'po  
o'ne. Noga suhuignada on'nigpeika'.  
Noga huakka'mon on'nigpeika'. Noga  
huakka'nanada on'nigpeika'apo.  
—Jesúsá huanigpeika'eritaj  
o'manmadika'uyate.

**Jakkiregya' huakjeyta  
o'batia'pakpo Jesúsá  
o'manmadika'uyate.**  
(Lc. 8.16-18)

<sup>21</sup> Nog Jesúsá o'mana'po:  
—Sikyo jakkiregya' huakjey  
e'bakpakte kosoa huakjeyte  
tiokkubukhue'dik o'nika'. Kenpa'ti  
huataytoyo huakjey huadahue'dik  
o'nika'. Kutopate huakjey on'huada'ika'.  
<sup>22</sup> Ken konig Diostaj eknopo'e' oy konig  
e'iregireg nogok aya'ada on'nopoəapo,  
aya'ada on'tiahuayapo. <sup>23</sup> Kenda  
o'nona'ne daka' yan'pee'. <sup>24</sup> Huadak  
hua'atayo'da daka' yan'nigpeika'. Sigda  
e'bayoknayo sigda Diosa bo'yokapone.  
Huakka' e'bayokikana'yo Diosa huakka'  
bo'yokapone. Konigti Diosen huadak  
hua'ataj daka' e'nigpeika'nayo Diostaj  
'urunanada moknopoəapo. <sup>25</sup> Sue'da



e'peenayo sue'da eknopoe'nayo Diosa kaknopoe'po bo'tihuapokapone nogiti nogiti Diostaj moknopoe'apo. Daka' peehue' ee'nayo Diosen huadak hua'ataj oknopoe'hue' ee'nayo kenda mo'nopoenigtaj Diosa bokkayapone. Onte'ti oknopoe'hue'dikada mo'eapone. —Jesúsa o'mana'uyate.

**Dios Huairitaj huaknopoe'eri  
ken konig huakid  
o'tipakbopo o'kerekapo.**

<sup>26</sup>Nogiti Jesúsa o'mana'po:  
—Dios Huairitaj huaknopoe'eri in konig o'e: Huabokerekpi' e'borute o'bakidena'po <sup>27</sup>ken o'taybedpo nogok o'taybedpo nogok huakid o'tibopo o'kere. Monig tibodik ya'et nopoe'hue' o'e. <sup>28</sup>Sorokyo o'enok o'tipakbopo o'kere. Huabokerek tihuapokhue' ee'tada o'kere. Huakkuru huakpi, huametpikon o'kere konig huakka' huakid o'magkupapakpo <sup>29</sup>e'maboyogde'te agkupaeaya'po ta'bayo o'hua'apo o'boyognok ogkupaeya'apo. —Jesúsa o'manmadika'uyate.

**Konig mostaza huakid o'tipakbopo  
huaboro'nanada o'kerehika'. Ken  
konig huakka'nanada Dios Huairitaj  
huaknopoe'eri o'neapo.**  
(Mt. 13.31-32; Lc. 13.18-19)

<sup>30</sup>Onte'ti Jesúsa o'manmadika'po:  
—Dios Huairitaj huaknopoe'eri ken konig o'neapo ijmanbatia'pakapoy. <sup>31</sup>Dios Huairitaj huaknopoe'eri konig mostaza huakid o'ne. Mostaza huakid suhuigkidda o'epo ta'bayo on'tukika'. <sup>32</sup>E'batukde'te nogok o'tipakbopo huaboro'nanada o'kerehika'. Huaboro'nanada o'enok hua'opite huakka' bakoya on'pakka'ika'. Ta'huiokte ika'dik o'ne. Ken konig oy sue'da Dios Huairitaj huaknopoe'eri o'ne. Nogoknayo huakka'nanada

huaknopoe'eri o'neapo. —Jesúsa o'manmadika'uyate.

**Huakka' aratbut egkupopakte  
Dios Huairitaj huaknopoe'eri  
o'noknopoe'apo ken konig  
o'eapo Jesúsa o'manbatia'pakpo  
o'manmadika'uyate.**  
(Mt. 13.34-35)

<sup>33</sup>Ken konig Jesúsa o'manmadika'po konig Dios Huairitaj yan'nigpeunhuahuika'apet nogda nogda o'manbatia'pakika'po. Keniga'da eanopoikapa' pee'dik yanet o'manbatia'pakika'uyate. <sup>34</sup>Huakka' aratbut egkupopakte Dios Huairitaj ken konig o'eapo yan'nigpeunhuahuika'apet o'manbatia'pakika'po ke'nen huanigpeika'eritanayo daka' o'manopoea'ika'uyate.

**Jesúsa e'hueniri'tone'taj  
bapoka'tere o'batika'uyate.**  
(Mt. 8.23-27; Lc. 8.22-25)

<sup>35</sup>Ken huame'noe baysik huanigpeika'eritaj o'mana'po:  
—E'pog monokteg. —Jesúsa o'mana'uyate.

<sup>36</sup>Ken huakka' aratbut egkupopakya' o'nokbaha'po kusi'petone'yo Jesústaj o'ntonohua'po nog kusi'petone'ere on'hua'uyate. <sup>37</sup>E'pognopoyo enhua'te huaboro'bapokada o'bahuatiakuy. Teya'da o'bapoknok huaboro'da o'hueniri'tone'po diga'da o'huekudpo huata'kotdikte o'uyate. <sup>38</sup>Jesúsnayo huata'pakte colchónte o'tay'uyate. On'mabo'po,  
—Huata'kotdikte o'ene, Huamanmadika'eri. ¿Menpa' mepu'kehue' i'e? —Jesústaj o'nona'uyate.

<sup>39</sup>Ken Jesús o'mabodpo, “Yabatik, bapokhue' yae'. Huenirihue' yae'.” Jesúsa ona'nok o'batikanpo bapokhue' o'epo kenpa'ti huenirihue' o'uyate.

40—Mena'po diga' mome'puk.  
Mena'po do'taj oknopoehue'  
mo'e. —Jesúsa huanigpeika'eritaj  
o'mana'uyate.

41 Huakka'da on'mepu'kepo,  
—¿Kenpihuay, in huabokerek be  
ya'e? Kentaj bapoka o'nigpee kenpa'ti  
e'poga o'nigpee. —Huanigpeika'eria  
huayahuaaya on'batia'pakuyate.

**Huabokerektaj huakka'ada toto'  
nokirega on'nopo'toe'uyate.**

(Mt. 8.28-34; Lc. 8.26-39)

5<sup>1</sup> Ken akodpen Gadara  
huadaribayo o'betato'uyate. <sup>2</sup>Jesús  
e'kotde'te kubarakbaya' nogbokerektida  
o'huatiakuyate. Kentaj dakhue'da  
nokirega o'nopo'tounhuahuika'uyate.

<sup>3</sup>Kubarakbayo o'noika'uyate.  
Kentaj sirobijtone'a tinukuhue'dik  
o'nuyate. <sup>4</sup>Nogok nogok sirobijtone'a  
huaba'ta'koypi' kenpa'ti hua'itakpi  
on'tinuku'ea'nig'a teyda e'po  
sirobijtone'taj o'tipukpukika' kenpa'ti  
o'bakpukika'uyate. Kentaj toehue'dik  
o'nuyate. <sup>5</sup>Huame'noe kenpa'ti sikyo  
o'hua'epo ote'yo kenpa'ti kubarakya'  
o'sagkia'ika'po huida' huata' o'bitakpo  
o'ayagsikatoka'po o'kika'uyate.

<sup>6</sup>Jesústaj o'tiahuaypo huikudate  
o'tisakotuyate.

<sup>7-8</sup>—Ken huabokerektaj yakorok,  
dakhue'da nokireg. —Jesúsa ona'nok  
huabokereka 'utta'da oa'tokpo:

—¿Mena'po do'taj o'huatiak, Jesús?  
Dios kutayo huae'erien Huasi'po i'ene.  
Diosa be'tihuapoke' kenpa'da castiga  
ogkahue' mee'. —Jesústaj 'utta'da  
ona'uyate.

<sup>9</sup>—¿Katedik i'e? —Jesúsa ona'uy.  
Huakka'da nokireg o'nenok,

—Do'hued huadik o'e "Huakka'."

<sup>10</sup>adyonda oro'taj ta'monahue' moe'.  
—Jesústaj diga' o'nona'uyate.

<sup>11</sup>Kente ote'te huakka'da huakyari'  
on'pe'nok,

<sup>12</sup>—Huakyariere a'eya'po yan'kud,  
oro'taj yamana'. —Jesústaj dakhue'da  
nokirega o'nona'nok,

<sup>13</sup>—Yan'kud. —Jesúsa e'mana'te  
nokirega huabokerektaj o'nenonpo  
dos mil huakyaritaj on'huankudonnok  
aya'da huaduk on'bahuarakpo kubogyo  
on'baajpo e'pogyo on'bata'ko'tuyate.

<sup>14</sup>Huakyari' huamatoe'erimeya  
kenda on'tiahuaydepo on'mepuke'po  
a'manbatia'pakya'po huakka' jakyo  
on'bake'tuyate. Ta'bayo kenpa'ti  
a'manbatia'pakya'po on'hua'uyate.  
Kenda Jesúsa o'ka' on'peedeipo  
Jesústaj on'huahua'po <sup>15</sup>o'nokyepo  
ken huabokerektaj huakka' dakhue'da  
nokirega huaboa'da en'maorokonde'  
on'tiahuay'uyate. Ken huabokereka  
daka' e'huadpo yudtaj o'otpo huadakda  
o'epo huadakda o'nopoepo. Kentaj  
on'tiahuaydepo on'me'pukuyate.

<sup>16</sup>Arabut keyo Jesúsere e'huaea  
on'tiahuaydepo kenda Jesúsa  
o'ka'de eatiahuay'a huakka' jakyo  
huae'eritaj on'manbatia'pakpo,  
Jesúsa dakhue'da nokiregtaj  
o'maoroka'de kenpa'ti huakyariyo  
en'huankudonde'te huakyari' huaduk  
on'bahuarakpo e'pogyo on'bata'kotnig  
on'manbatia'pakuyate. <sup>17</sup>Kenda  
on'peedeipo "Oro'enbaya' yahuade'."  
Jesústaj diga'da o'nona'uyate.

<sup>18</sup>Jesús kusi'petone'yo a'huaya'po  
e'huadde'te ken huabokereky'a'  
dakhue'da nokireg okoroka'niga "onere  
e'hua'ta' ijpaki," Jesústaj ona'nok,

<sup>19</sup>—Doere huahue' ya'e. O'nen  
jakyo yahuati'. O'nen huabettaj  
yamanbatia'pak. "Dios Huairi  
me'tinepahui'po be'yarea'dene." Daka'  
yamanbatia'pakti'. —Jesúsa ken  
huabokerektaj ona'uyate.

<sup>20</sup>Ken huabokereka  
a'manbatia'pakhuaya'po o'hua'po  
Decápolis huadaribayo huakka' jakyo  
huaboa'da o'manbatia'pakonhuahua'po

“Jesúsa dakhue’da nokiregtaj mekmaename’ne, be’yareame’ne,” o’manbatia’pakonhuahua’uyate. Aya’ada on’peedepo “Kenpihuay, ’urunanada Jesús Huairia o’kame’tē,” on’batia’pakuyate.

**Jairoen huayobutaj  
o’noyhuada’uyate. Kenpa’ti  
ettone’ Jesúsen yudtaj o’nejdepo  
o’yarud’uyate.**

(Mt. 9.18-26; Lc. 8.40-56)

<sup>21</sup> Onte’ti akodpen kusi’petone’yo Jesús e’kumejde’tē akta’bogpete huakka’ada aratbuta on’tikupopakuyate. <sup>22</sup> Jairo judfoen huaitake’ jak huairi o’uyate. Jesústaj o’huatiakpo o’tiahuaydepo hua’ite huikudate o’tisakotpo,

<sup>23</sup> —Do’hued huayetsi’po huabueydikte mekene. Betayare’po kanoe’po huaba’a be’tatibata’tepo doere bohua’. —Jesústaj diga’da ona’uyatenok.

<sup>24</sup> Jairoere Jesús o’hua’uyate. E’hua’tē huakka’ada on’tahua’po aratbutpoya’ a’daya’po o’nogka’uyate.

<sup>25</sup> Huakka’ aratbut egkupopakyo ettone’ o’ēpo dakhue’da o’ēpo doce huabayok o’tipokde mimi batikhue’ o’unhuahuika’uyate.

<sup>26</sup> Nogtaj nogtaj huamadakka’eritaj o’bahuahuae’ika’uynig’a aya’da ke’nen huakupe e’yoktada yareahue’ o’ēpo nogiti nogiti o’dakhue’pakika’uyate.

<sup>27</sup> Jesúsa huakka’tada o’bayarea’ika’ aratbuta on’batia’paknok o’peedepo Jesústa’piyen o’huatiakpo egkupopakyo Jesúsen yudtaj o’nejpo, <sup>28</sup> “Ke’nen yudtaj e’nejnayo iyyareapoy.” Huanopo’ada o’nopoe’po,

<sup>29</sup> o’nejpo mimi o’batikonpo “ijyarudi” o’nopoe’uyate. <sup>30</sup> Betapi’ huaboa’da iyyareadi Jesúsa o’nopoe’po huakka’ aratbutyo huata’piyon o’korudpo, —¿Be’a me’nej? —O’mana’nok.

<sup>31</sup> —Huakka’ada aratbutpoya’ monda’ene a’daya’po mogka’ne. “¿Be’a me’nej?” ¿Mena’po ia’? —Jesúsen huanigpeika’eria o’nona’uyate.

<sup>32</sup> Jesúsanayo be’a me’nejne o’nopoe’po o’tiokpokubere’uyate.

<sup>33</sup> Ken Jesúsa be’yareadne ettone’a o’nopoe’depo diga’da o’me’pukpo Jesústaj o’huahua’po hua’ite huikudate o’tisakotpo, “o’nejne idada iyyarudi,” Jesústaj buttida ona’uyate.

<sup>34</sup> —Do’taj oknopoenok o’yareaddene. Dakda i’ēpo daka’da yahuati’, sion. —Jesúsa ona’uyate.

<sup>35</sup> Jesúsa ettone’taj e’batia’pakte Jairoen jakya’ huabokerekakon okyeyakpo,

—O’nen huayetsi’po o’bueyde. Huamanmadika’eritaj totiakhue’ yae’. —Jairotaj o’nona’uyate.

<sup>36</sup> Jesúsanayo kenda o’peepo nigpeehue’ o’ēpo,

—Me’pukhue’ yae’. Do’hua o’yarea’apo meknopoe’. —Jesúsa Jairotaj ona’uyate.

<sup>37</sup> —Pedro Jacobo Juanereyo’da do Jairoere hua’dik o’ne. —O’mana’po o’hua’po <sup>38</sup> huairien jakyo okyeyakdepo huakka’ aratbuttaj o’batiahuay’uyate. Ettone’si’po e’bueyta’ diga’da on’bahuikpo on’sagkia’uyate.

<sup>39</sup> O’kuddepo,

—Mena’po bo’sagkia’po diga’da mo’bahuik. Ettone’si’po bueyhue’ o’ē. O’taypo o’ē. —Jesúsa o’mana’nok,

<sup>40</sup> Jesústaj on’tierikuynig’a aya’tada o’maoroka’depo ettone’si’poen huaoj huaye ke’nen huatahua’eretere ettone’si’pobuey e’huedyo o’batokudpo, <sup>41</sup> mune’yoen huaba’ta’ o’ba’padpo,

—“Talita, cumi.” Yabo’ mune’yosi’po, ona’ne. —Jesúsa ona’uyate.

<sup>42</sup> Idada mune’yosi’po o’bodpo o’huae’uyate. Doce huabayok o’toe’uyate. Diga’da on’mepuke’po “kenpihuay” oda’uyate. <sup>43</sup> “Ken bo’tiahuaynig betapi’

manbatia'pakhue' yane'." Ighua'da o'mana'po, "mune'yosi'potaj aypopi yan'yok," o'mana'uyate.

**Nazaretyo Jesús o'ika'uyate.**

(Mt. 13.53-58; Lc. 4.16-30)

**6** <sup>1</sup>Ken, keya' on'bakhua'po huanigpeika'eriye Jesús huanbayokon okye'uyate.

<sup>2</sup>Okmapie'ahuaddik huame'noe e'ede'te judioen huaitake' jakyo huaboa'da o'manmadika'uyate. 'Urua'nanada o'manmadika'nok judío aratbut on'peede'po on'mepuke'po,

—iKenpihuay! 'Urua'da o'nopo'e.

Menpapi' huakka'da yanopoe'. Meyopi' huaboa'da huakka' yanopoe'. Ka'bayare'po be'a yateyya'. <sup>3</sup>Huamenhuea'eri o'enig'a, Maríaensi'po o'enig'a. Jacobo ke'nen huama'buy o'e José Simón Judas. Jesús en huidpopi' oro'ere o'nika'. —Oda'po onte'ti e'peeta' pakhue' o'nepo konig digda on'huanopoe'uyate.

<sup>4</sup>—Nogbayo huae'eria Diosen huamanbatia'pakeritaj e'peeta' on'pakika'. Huadakda o'ne. E'bahuaa'ta' on'pakika'. Ke'nenbayo huae'erinayo e'peeta' pakhue' o'nika'. Huadakda o'e. E'bahuaa'ta' pakhue' o'nika'. Konigti ke'nen huabet ke'nen jakyo huae'erikon e'peeta' pakhue' o'nika'. —Jesúsa Nazareteritaj o'mana'uyate.

<sup>5</sup>Keya' Jesús taj eknopoe'ta' pakhue' o'nenok konig Dios teyda ka'dik o'enig Jesús a kahue'dik o'enig'a kenyo'da sue'da dakhue'da o'tibata'tea'po o'bayarea'uyate.

<sup>6</sup>Ke'nenbayo huae'eri eknopoe'ta' pakhue' o'nenok Jesús a kenpihuay o'nopo'e'uyate. Nogok nogda nogda huakka' jakyo meyhue'da o'manmadika'uyate.

**Huanigpeika'eritaj  
kanmanmadike'po  
o'mata'mona'uyate.**

(Mt. 10.5-15; Lc. 9.1-6)

<sup>7</sup>"Menhuatiak." Jesús a doce huanigpeika'eritaj o'mana'depo

nogda nogda botta' nogyo nogyo o'mata'mona'po,

—Doa o'nona'nok dakhue'da nokiregtaj maoroka'dik mo'ea'pone.

<sup>8</sup>Dagte bo'huahuudhuahuika'po katepi' tohuahue' yanikati'. Oteypaj nogtiyo'da yan'tohua'. Huenpu aypo huakupepi' tohuahue' yane'. <sup>9</sup>Hua'iot yan'otpo, nogtida' opiot yan'otpo nogda tohuahue' yane'. <sup>10</sup>Jakyo bo'kuddepo keyoyo'da yanikati'. Huakka' jakya' yan'hua'epo keyo yan'tayikati'. <sup>11</sup>Jak huatae'eria opudtaj pakhue' ee'nayo kenpa'ti e'peeta' pakhue' ee'nayo ken jakya' huakka' jakya'pi' yan'bakuati'. Yan'orokdepo Diostaj dakhue'da o'ka'dey aya'ada kan'nopo'e'po soroka e'itimabette yan'itihuekeadti'. Kenomeytaj Dios a digan'nanada castiga o'magka'apo. Sodoma huakka' jak huae'eritaj kenpa'ti Gomorra huakka' jak huae'eritaj sue'da castiga o'magka'apo. —Jesúsa doce huanigpeika'eritaj o'mata'mona'po o'mana'uyate.

<sup>12</sup>Ken doce huanigpeika'eria on'bahua'udhuahuika'po nog huakka' jakyo nog huakka' jaky o'huap'o huadak hua'a on'manbatia'pakpo "yan'nopo'korea', Dios Huairitaj yanoknopoe'," on'mana'po <sup>13</sup>dakhue'da nokiregtaj on'maoroka'po kenpa'ti dakhue'taj huasihuua on'batikubata'tepo on'bayareadyate.

**Juan bautista o'buey'uyate.**

(Mt. 14.1-12; Lc. 9.7-9)

<sup>14</sup>Jesúsa 'uruana'nanada o'kika'nig huabada aratbut on'batia'pakika'nok Herodes huairia o'tipeede'po, —Ken Juan bautista o'etaj. Huakudaka'da ee'tada Dios a noyhuadame'tenok 'uruad'a o'kika'te. —Herodes nama'da o'nopo'epo Jesús taj o'tia'pakuyate.

<sup>15</sup>—Elías Diosen huamanbatia'pakerikudak

o'noyhuadme'te Jesús o'etaj.

—Nogomeya on'batia'pakuyate.

—Diosen a'neneri

huamanbatia'pakeri Jesús o'etaj.

—Nogomeya on'batia'pakuyate.

<sup>16</sup>Herodes kenda o'peedepo,

—Ke'na Juan o'etaj. Juantaj

yan'huerenokteg i'mana'meynig'a

o'noyhuaddepo Jesús o'etaj.

—Herodesa oa'uyate.

<sup>17</sup>Herodías o'paknok Herodes huairi

Juantaj huabakuda' jakyo o'kudame'te.

Herodías Herodesen huama'buy

Felipeen huatoe ee'tada Herodesa

o'koreame'tenok.

<sup>18</sup>—Huama'buyen huatoe

koreahue'dik i'ene. —Juana ona'nok

<sup>19</sup>Herodías Juantaj diga' o'huadiaypo

e'arakta' o'paknig'a arakhue'dik

o'eme'te. <sup>20</sup>Juan huadakyoda

o'kika' kenpa'ti Diosenyo'da o'kika'

Herodesa o'nopoepo Juantaj daka'

o'tiokikame'nok Herodías arakhue'dik

o'eme'te. Juantaj o'peepo nopoenkahue'

ee'pi' durugda o'peeme'te. <sup>21</sup>Herodesen

cumpleaños fiestate Juantaj arakdik

ijjey Herodíasnayo o'nopoeme'te.

Fiestate Herodesen huairi Galilea

huairitaj o'batobapeme'te.

<sup>22-23</sup>Herodíasen huayobu

o'bahuakudpo baile e'nige'te huairi

Herodesere huakka'da on'durugpakpo,

—Katepi' i'paknig mena' o'yokapone.

Huakka'pi' i'paknig o'yokapone.

Buttida ijjay. —Herodesa Herodíasen

huayobutaj ona'uyate. <sup>24</sup>Huayetaj

o'huahuatupo,

—¿Katepi' ona'dik ijjay? —Oname'te.

—Juan Bautistaen huaku beyok.

Yana'. —Oname'te.

<sup>25</sup>Herodes huairitaj o'huahua'depo,

—Oyedda baegte Juan Bautistaen

huaku beyok. —Mune'yoa oname'te.

<sup>26</sup>Herodes kenda o'peedepo pai'da

eknopoeada “Aya'da katepi' on i'pak

menati' kenda ijyokapoy. Buttida

ijjay.” Oa'nig. Aya'ada on'peenok nogda

ea'ta' pakhue' o'epo <sup>27</sup>“Huabakuda'

jakyo yahuati'. Juantaj yahuerenokteg.

Yagkutotiak. Herodíasen huayobutaj

yayok.” Herodesa sorotataj

oname'tenok <sup>28</sup>huabakuda' jakyo

Juantaj o'huerenoktegpo baegte

o'totiakpo Herodíasen huayobutaj

o'yokme'nok ke'na huayetaj o'yokme'te.

<sup>29</sup>Kenda Juanen huanigpeika'eria

o'noknopodepo on'tiakpo huabuey

on'tohua'po ogkubarakka'uyate.

### Cinco mil huabokerektaj

#### Jesúsa aypo o'bia'po

#### o'batobape'uyate.

(Mt. 14.13-21; Lc. 9.10-17; Jn. 6.1-14)

<sup>30</sup>Nogok Jesúste doce

huamata'moneria on'koredepo

kenda o'kadhuahua'mey

Jesústaj on'onbatia'pakuyate.

Aya'da o'manmadikika'mey

on'onbatia'pakuyate. <sup>31</sup>Huakka'nada

on'batiakika'nok on'bahua'ika'nok

menokapi' bapehue'dikda o'nepo,

—Monhua'. Kente arabut ehue'

e'nika'yo okmapie'ahuaddik a'eya'po

monhua'. —Jesúsa o'mana'uyate.

<sup>32</sup>Kente arabut ehue' e'nika'yo

kusi'pete Jesús ke'nen doce

huamata'moneriere on'bahua'uynig'a.

<sup>33</sup>En'hua'te huakka'ada on'batiahuaypo

Jesústaj on'nokie'po aya' huakka'

jakya' keyo yan'betapet on'nopoepo

on'baketonhua'po huakkuruda

on'bakye'uyatenok. <sup>34</sup>Jesús o'kotpo

huakka'tada o'batiahuaypo kenomey

konig oveja o'nepo huabet toehue'onig

o'nenok Jesúsa o'matinepahui'po

huaboa'da o'manmadika'uyate.

<sup>35</sup>Huaboa' e'sikonyakte Jesústaj

on'huatiakpo,

—O'sikde. Iyo arabut ehue' o'ne.

<sup>36</sup>Aypo toehue' o'nenok nog jakyo

nog jakyo huakka' jakyo meyhue'da

aypo kan'baepo yamata'mona'.

—Huanigpeika'eria o'nona'uynig'a,

<sup>37</sup>—Opuda aypo yan'bayok. —Jesúsa o'mana'nok,

—¿Aypo a'bayokya'po docientos denario huakupea pan kabae'po menpa' hua'dik o'e oro'? —Huanigpeika'eria o'nona'uyate.

<sup>38</sup>—¿Meniga' pan mo'toe?

Yan'hua'po yan'tiahuay'. —Jesúsa o'mana'uyate.

On'nopoedepo,

—Huabaniga' pan botta' biigyo'da o'toye. —Jesústaj o'nona'uyate.

<sup>39</sup>“Huakupo huakupoa' mirebate

yan'bahuad.” Jesúsa o'mana'nok <sup>40</sup>cien kenpa'ti cincuenta huakupo huakupoa' on'bahuaduyate. <sup>41</sup>Ken Jesús huaba'te cinco pan botta' biigere o'badapdo kurudyo o'mabopo Diostaj dakiti o'tiona'pakdepo pannopote o'posakea'po huanigpeika'eritaj kan'bayoke'po o'bayoke'uyate. Botta' biigkon okpukpukpo aya'tada o'bayoke'uyate. <sup>42</sup>Aya'ada on'bape'po noteyya' ogka'uyate. <sup>43</sup>On'tiokayonpo doce kusogyo hueda'da huata'suj on'dohuea'uyate. Pan biig huaboro' huaenmo boro'ta'sujmonere on'tihueda'uyate. <sup>44</sup>Cinco mil huabokerek ken pan on'bape'uyate.

**Jesús huahuētiudte o'huae'uyate.**

(Mt. 14.22-27; Jn. 6.16-21)

<sup>45</sup>“Kusi'peyo yan'kudpo Betsaidayo akudpen huakkuru yanoktegti'.” Jesúsa huanigpeika'eritaj o'mana'depo huakka' aratbuttaj jakyoda o'mata'mona'uyate.

<sup>46</sup>O'mata'mona'depo Diostaj a'tiona'pakya'po Jesús ote'yo o'behuikpo ijhue'da o'tiona'pak'uyate.

<sup>47</sup>E'sikde'te kusi'petone' e'pognopoyo o'enig'a Jesúsyo'da huadarite o'uyate.

<sup>48</sup>E'pognopoyo diga' o'baboknok e'nokhuayaga'tada huahue' o'nuyate. Sikyoedda Jesúsa huahuētiudte

o'bahuatiakpo meyhue'da o'batipokaynig'a, <sup>49-50</sup>huahuētiudte e'huae'taj huanigpeika'eria on'tiahuaypo aratbuten nokireg o'e on'nopoepo huakka'da on'me'pukpo on'sagkia'uyate.

—Me'pukhue' yane'. Do ijjej.

—Jesúsa o'mana'uyate.

<sup>51</sup>Kusi'petone'yo o'kudpo huanigpeika'eriere on'huaduyate. E'kudte bapoka o'batikon'uy. Huakka'nanada on'mepuke'po “kenpihuay” oda'uyate.

<sup>52</sup>Jesús o'paknok Diosa pan o'biame' nopenkahued kenpa'ti Jesús Diosen Huasi'po o'e oknopoe'hued o'nenok diga'nanada on'me'pukuyate.

**Genesaretyo Jesúsa o'bayarea'uyate.**

(Mt. 14.34-36)

<sup>53</sup>E'pogtone' o'noktegdepo Genesaret huadaribayo on'betdepo o'nokye'uy. <sup>54</sup>En'kotde'te Jesús o'e aratbut o'nokie'depo, <sup>55</sup>Jesúste dakhue' e'huae' a'manpatotiakya'po nogyon nogyon on'baketpo huaboa'da Jesúste asukte on'manpatotiakuyate. <sup>56</sup>Meyopi' Jesús o'hua'epo jak kuruyo huakka' jakyopi' dagte dakhue' e'huae' on'manpahueda'po “O'nen huaok huakubogpi kan'nejatue'po,” Jesústaj diga' o'nona'nok aya'ada on'nejdepo Diosa o'bayaread'uy.

**Huanopoya'da dakhuea'da on'nopoepo Diostaj dakhuea' ogkika'.**

(Mt. 15.1-20)

**7** <sup>1</sup>Nogok Jerusalénya' fariseo huairi Moisésenba' huamanmadika'eriere on'tiakdepo Jesústaj on'huahua'uyate. <sup>2</sup>Konig adhuea'pane' bapehued on'bakoyo'ika'uyatenig sue'ada Jesúsen huanigpeika'eria konig kahue' o'nika'po ba'koyohue'ada on'babiknig judío huairia on'batiahuaypo

“dakhuea’da ogkika’,” on’huaa’uyate.

<sup>3</sup>(Konig adhuea’pane’ ogkika’uyatenig aya’ judfomey fariseoere ogkika’po aypo bapehued huakka’da on’ba’koyo’ika’. <sup>4</sup>Kenpa’ti aypo huabae’ jakya’ on’tiakpo bapehued on’ba’koyo’ika’. Vasos, platos, ollas, kutopatakon on’ba’koyoa’ika’uyate.)  
<sup>5</sup>Konigepo fariseoa Moisésenba’ huamanmadika’erierea Jesústaj o’nona’po:

—A’nenda oro’en adhuea’pane’ huadaknopoda Diosa meknopoe’po bapehued on’ba’koyoika’uyate. Mena’po kenda o’nen huanigpeika’eria nigpeehue’ada ba’koyohue’ada yan’bape’ika’. —O’nona’uyate.

<sup>6</sup>—Diosen huamanbatia’pakeri Isaías opud nama’da huanopoe’eritaj daka’ bo’timadoya’uyate:

In aratbuta Diostaj o’paki nama’da o’dika’nig’a do’taj huanopoya’da eretpakhue’ o’ne. <sup>7</sup>Nama’da do’taj dakiti mo’tiona’pakika’ne. Huabokerekada e’huaa’yo’da on’manmadikika’nig’a.

Isaías o’madoya’uyate. <sup>8</sup>Kenda opudomey bo’kika’po Diosen e’mana’ba’ nigpeehue’ada konig opuden adhuea’pane’ ogkika’nig bo’kika’po vasos platos nogtaj nogtaj bo’koyoa’ika’po nogda nogdakon bo’kika’nig’a. <sup>9</sup>Konig opuden adhuea’pane’ on’pakpo ogkika’uyatenig a’kikaya’po Diosenba’taj nigpeehue’ada bo’kika’ne. <sup>10</sup>“O’nen huaojtaj huayetere nigpeika’dik mo’ene kenpa’ti tihuapokika’dik mo’ene. Pai’da ee’nayo bayokika’dik mo’ene,” kenpa’ti “Huaojtaj huayetapi’ huasi’poa dakhuea’ e’huaa’ika’nayo bueydik mo’ene.” Moisésa o’mana’uyate.

<sup>11</sup>“Huaojtehuapa’ huayeretehuapa’ aya’da Diostaj o’bayokde’po opudtaj bayokhue’dik o’nene.” Kenpa’ be’api’ huaojtaj huayetere ona’dik

o’ne. <sup>12</sup>Kenpa’ ena’nayo huaojtaj huayetere tihuapokhue’dik o’nepo bayokikahue’dik o’nepo nama’da mo’manmadikika’po <sup>13</sup>ken konig adhuea’pane’ ogkika’nig bo’kika’po Diosen hua’ataj nigpeehue’ mo’ika’po, ken konig nogda nogda nama’da bo’kika’nig’a. —Jesúsa judfio huairiomeytaj o’mana’uyate.

<sup>14</sup>“Iyon yan’batiak.” Huakka’ aratbuttaj Jesúsa o’mana’po, —Do’taj menigpeepo yan’nopoenka’. <sup>15</sup>Katepi’ e’pe’pi’ Diostaj dakhuea’ e’ka’ ehue’dik o’e. Dakhue’dik ea’nayo, da ea’nayopi’ Diostaj dakhuea’ e’ka’ e’dik o’e. <sup>16</sup>Do’taj daka’ menigpee’. —Jesúsa o’mana’uyate.

<sup>17</sup>Huakka’da aratbut egkupopakya’ Jesúsa e’bakhuae’ jakyo e’kudde’te “Katepi’ bo’pe’po konig Diostaj dakhuea’ e’ka’ ehue’dik o’e. Ia’nig. Nopoenkahue’ o’nepo daka’ mona’.” Huanigpeika’eria Jesústaj o’mona’uyate.

<sup>18-19</sup>—Menpa’ opud kenpa’ti nopoenkahue’ mo’e. Katepi’ mo’bape’po hua’aypoyo o’kudika’po huaminyo o’hua’po huaminya’ ken o’orokika’. Huanopo’yo kudhueada Diostaj dakhuea’ e’ka’ ehue’dik o’e. —Jesúsa o’mana’uyate.

Kenda oa’nok katepi’ aypo huaenpi’ bape’dik o’ene. Aya’da bape’dik o’ene, huaboa’da on’nopoe’uy.

<sup>20</sup>—Huanopoya’da dakhuea’da e’nopoe’nayo dakhuea’da bo’ka’apone, dakhuea’da boa’apone. Kennayo Diostaj dakhuea’da o’e. <sup>21</sup>Huanopoya’da on’pakpo dakhuea’da on’nopoika’po, huanopoya’da on’eretpakpo nogen huatoe on’bakdejpo, nogtaj nogtaj on’bakdeika’po, on’huadiaypo on’barakika’po, <sup>22</sup>huanopoya’da on’pakpo on’bereika’po, huanopoya’da nogen en’tamaeta’ on’eretpakpo, huanopoya’da dakhuea’ ogkika’po, huanopoya’da nama’da on’manika’po,



huanopoya'da aya'da diga'da on'eretpakika'po, huanopoya'da diga on'bahuahuayika'po, huanopoya'da on'bahuae'ika'po, huanopoya'da huata'tada on'pakika'po huanopoya'da konig nopoehue'ada ogkika'po. <sup>23</sup>Ken konig huanopoya'da aratbut ogkika'nok Diostaj dakhue'ada o'ne. —Jesúsa o'mana'uyate.

**Esoeri ettone'a Jesústaj  
oknopoe'uyate.**

(Mt. 15.21-28)

<sup>24</sup>Keya' Jesús o'hua'po Tiro Sidónere huadaribayo o'hua'uyate. Jakyo o'kudpo iregireg e'kudta' e'paktada sue'ada on'tiahuaynok <sup>25</sup>ettone'si'poen huaye idada o'nopopepo Jesúsen hua'ite huikudate o'tihuad'uyate. Ke'nen huayobutaj toto' nokirega o'nopo'toenok dakhue'ada o'uyate. <sup>26</sup>Ettone' esoeri o'epo sirofenicia huae'eri o'uy. "Do'hued huayobutaj toto' nokiregtaj yakoroka'." Jesústaj ona'uyate.

<sup>27</sup>—Hueretda judío huasi'po huakkuruda bape'dik o'nika'. Huasi'poen aypo yokhue'dik kuhuataj. —Jesúsa esoeri ettone'taj ona'nok,

<sup>28</sup>—Ee', Huairi. Kuhuanayo kutopatopen huasi'poen e'ta'sujkahua' on'bapika'. —Ettone'a ona'nok,

<sup>29</sup>—Huadaknada mena'nok hua'dik i'e. Toto' nokireg huayobutaj o'takorokonde. —Jesúsa ona'uyate.

<sup>30</sup>Jakyo o'kumejdepo huayobu huatayte dak e'unde'te o'huednig o'hahuay'uyate. Toto' nokireg o'orokde'uyate.

**Huabokerek a'pakhue'dik kenpa'ti  
e'peokbettaj Jesúsa o'yarea'uyate.**

<sup>31</sup>Jesús Tiro huadaribaya' o'hua'po Sidónyo o'pokpo Decápolis huadaribayo nog jakyo nog jakyo o'pokpo e'pog Galileayo o'tiakuyate.

<sup>32</sup>Keyo huabokerektaj on'huatotiakpo e'peokbet kenpa'ti a'pakhue'dik e'huae', "yatibata'te." Jesústaj o'nona'nok

<sup>33</sup>huakka' aratbutya' o'baktohua'depo o'peokba'kudpo o'bapitisupupo o'no'deya'po, <sup>34</sup>kurudyo o'tiahuaypo, "aaj" oa'po, "yapeokbete'," oa'uyate.

<sup>35</sup>Idada o'peokbeteonpo o'noyarudpo huadakda a'pakdik o'uyate. <sup>36</sup>"Kenda ijka'dey nogomeytaj batia'pakhue' yane'." Jesúsa o'mana'nig'a ighua'mon e'mana'tada nogiti huakka'mon kenda on'batia'pakonhua'po. <sup>37</sup>Kenpa'ti Jesústaj on'mepuke'po,

—Aya'tada 'urua'nanada o'kika'po e'peokbettaj o'mapeea'apo kenpa'ti a'pakhue'dik huaboa'da a'pakdik o'ne. —Aratbuta on'batia'pakuyate.

**Cuatro miltaj Jesúsa  
e'batobape'uyate.**

(Mt. 15.32-39)

**8** <sup>1</sup>Nogok onte'ti huakka'nanada egkupopakte kenpa'ti aypopi' ehue'da o'uyate. Jesús kenda o'nopopepo huanigpeika'eritaj o'mana'po:

<sup>2</sup>—Inomey aratbut bapa'me'noea' iyoda doere o'nedepo aypobayo' o'nenok ijmatinepahui'po.

<sup>3</sup>Jakyoda mata'monahue'dik ijjej. Huakka'mon bidteda on'tiakme'tenok e'mata'mona'nayo dagta' arogdik o'nenok. —Jesúsa o'mana'uyate.

<sup>4</sup>—Iyo aratbut ehue' o'nika'. ¿Meyo aypo o'eyapet? —Jesúsen huanigpeika'eria o'nona'uyate.

<sup>5</sup>—¿Meniga' pan mo'toe? —Jesúsa o'mana'nok.

—Siete. —O'nona'uyate.

<sup>6</sup>"Barakte yan'bahuad." Jesúsa o'mana'uyate. Siete pan o'ba'padpo, "Dakiti Dios, daka' joka'ne,"

o'tiona'pakdepo o'posakea'po huanigpeika'eritaj o'bayoke'uyatenok aratbuttaj on'bayoke'uyate. <sup>7</sup>Sue'da biigkon on'toenok "Dakiti Dios"



ona'depo "yan'bayoke'," o'mana'uyate.  
<sup>8</sup>Noteymeya'da aya'ada on'bape'uyate.  
 Noteymeya'da en'bapepi' siete kusogyo  
 huata'suj huedmeya'da on'dohuea'uyate.  
<sup>9</sup>Konig cuatro mil on'bape'uyate.  
 "Jakyoda yan'huati'," Jesúsa  
 o'mana'depo, <sup>10</sup>huanigpeika'eriere  
 kusi'petone'yo o'kuddepo Dalmanuta  
 huadariyo o'hua'uyate.

**Konig Diosayo'da ka'dik kurudya'  
 katepi' oro' tiahua'yhue' o'ika'uynig  
 mo'nigka'. Fariseo huairia Jesústaj  
 o'nona'uyate.**

(Mt. 16.1-4; Lc. 12.54-56)

<sup>11</sup>A'ti fariseomey Jesústaj  
 on'huatiakdepo huaboa'da  
 on'batia'pakpo a'dikdikya'po, "konig  
 Diosayo'da ka'dik kurudya' katepi' oro'  
 tiahua'yhue' o'ika'uynig mo'nigka',"  
 Jesústaj o'nona'uyate. <sup>12</sup>Huanopoya'da  
 "aaaj" oa'depo,

—"Konig Diosayo'da ka'dik kurudya'  
 katepi' oro' tiahua'yhue' o'ika'uynig  
 mo'nigka'." Nama'da o'nona'ne. Konig  
 mona'nig opudtehuapa' kahue' ijjeapoy,  
 buttida ijjay. —Jesúsa o'mana'uyate.

<sup>13</sup>Jesús o'bakhua'po kusi'petone'yo  
 o'kudpo akodpen o'hua'uyate.

**"Fariseo huairi dakhue'dik e'huæ'  
 on'manmadikika'. Keyoj ijjay."**

**Jesúsa oa'uyate.**

(Mt. 16.5-12)

<sup>14</sup>Kusi'pete on'hua'po pan e'tohua'ta'  
 o'nokkahuuduyate. Nogtiyo'da  
 on'to'e'uyate kusi'peyo.

<sup>15</sup>—Eya', fariseoen e'bia'ontaj keyoj  
 ijjay. Herodesen e'bia'ontaj keyoj ijjay.  
 —Jesúsa o'mana'uyate.

<sup>16</sup>—Pan to'ehue' o'enok kenda  
 mona'ne. —Jesús en huanigpeika'eria  
 huaboa'da huayahuaya  
 on'batia'pakuyate.

<sup>17</sup>—Pan to'ehue' o'ey mena'po  
 mo'batia'pak. Pantaj mepu'kehue'dik

mo'ika'ne. Kenda ka'dik ijjej  
 nopo'ehued mo'e kenpa'ti  
 nopoenkahued mo'ene. Menpa'  
 huanopoya'da oknopo'ehue'dikda  
 mo'ika'ne. <sup>18</sup>Huakpoa mokpoenig'a  
 menpa' tiahua'yhue' mo'e. Huapeok  
 bo'peokjene menpa' pe'ehue' mo'e.  
 Pan ijbiam'ey menpa' bokkahue'de.  
<sup>19</sup>Cinco mil huabokerektaj cinco  
 pan ijbayokemey. ¿Meniga' kusogyo  
 huata'suj huedmeya'da yan'ohueame'?  
 —Jesúsa o'mana'uyate.

—Doce. —O'nona'uyate.

<sup>20</sup>—Cuatro mil aratbuttaj siete  
 pan ijbayokemey. ¿Meniga' kusogyo  
 huedmeya'da yan'ohueame'? —Jesúsa  
 o'mana'nok,

—Siete. —Huanigpeika'eria o'nona'uyate.

<sup>21</sup>—Menpa' kenda nopo'ehued mo'e.  
 —Onte'ti o'mana'uyate.

**Huakka' jak Betsaidaya' Jesúsa  
 ekpobigtaj o'yareaduyate.**

<sup>22</sup>Nogok Betsaida huakka' jakyo  
 on'tiakuyate. Jesúste ekpobigtaj on'totiakpo  
 "yakpotibata'te'," o'nona'uyatenok  
<sup>23</sup>ekpobigtaj o'ta'koypo huakka' jakya'  
 o'baktohua'po igkusi'huea okpotihueke'po  
 o'tibata'tepo,

—¿Menpa' sigpi' tiahua'ydik i'e'? —Ona'uyate.

<sup>24</sup>Ekpobig o'tiahua'yatupo,  
 —Huabokerektaj ijtihua'yapo konig  
 ohuey on'hua'e. —Jesústaj ona'uyatenok,  
<sup>25</sup>onte'ti Jesúsa okpotibata'tenok huaboa'da  
 'urumanada aya'tada o'tiahua'yuyate.

<sup>26</sup>—O'nen jakyo yahuati'. Huakka'  
 jakyo huahue' yae'. Kenda o'nigka'ne  
 batia'pakhue' yae'. —Jesúsa ona'uyate.

**Diosen Cristo i'ene. Diosa kurudya'  
 me'ta'mona'uyne. Pedroa Jesústaj  
 ona'uyate.**

(Mt. 16.13-20; Lc. 9.18-21)

<sup>27</sup>Cesarea de Filipino huadaribayo  
 nog jakyo nog jakyo huanigpeika'eri  
 Jesúsere on'hua'epo dagte,

—¿Be o'ea' do'taj aratbuta menhuaa'ika'? —Huanigpeika'eritaj Jesúsa o'mana'uyate.

<sup>28</sup>—Juan Bautista on o'e. Noga bo'huaa'ika'ne. On Elías o'e. Noga bo'huaa'ika'ne. Diosen huamanbatia'pakero o'e. Nogomeya bo'huaa'ika'ne. —Huanigpeika'eria o'nona'nok,

<sup>29</sup>—¿Be o'ea' do'taj opuda on'huaa'ika'? —Jesúsa o'mana'uyate.

—On Diosen Cristo i'ene. Diosen Huasi'po i'enok Diosa me'ta'mona'uyne. —Pedroa ona'uyate.

<sup>30</sup>—Kenda ona'ne be'tapi' manahue' yane'. —Jesúsa o'mana'uyate.

**“Ijbueydeapoy.” Jesúsa o'batia'pakpo oa'uyate.**

(Mt. 16.21-28; Lc. 9.22-27)

<sup>31</sup>Jesúsa huaboa'da o'manmadika'po:

—Do huabokerek ijje'po Diosya' ijtiakuy. Pai'nanada i'jnopoe'apoy. Judío huairitone', sacerdote huairi, kenpa'ti Moisésenba' huamanmadika'erieria do'taj eknopoe'ta' pakhue' o'nepo men'arakapone. Bapa'me'noe e'pokde'te Diosa me'noyhuada'apone.

<sup>32</sup>—Jesúsa daka' o'mana'uyatenok Pedroa o'tohua'depo, “kenpa' ahue' ya'e, Huairi,” ona'uyng'a

<sup>33</sup>Jesúsa o'batikorudpo ke'nen huanigpeika'eritaj o'tiahuaypo Pedrotaj ona'po:

—Konig huabokerekada nama'da on'nopoika'nig o'na konigti i'nopoika'po Diosen e'nopoe' nopoe'hue'da i'ene. Konig totonig ia'ne yahuati'. —Jesúsa ighua'da ona'uyate.

<sup>34</sup>Huanigpeika'eritaj kenpa'ti huakka'da aratbutaj menhuatiakde' o'mana'depo huaboa'da o'manmadika'po:

—Bepi' do'taj e'nigpeika'ta' e'paknayo katepi' huá'enda on'pakika' ona'ti eretpakhue' ka'nike'. Ona'ti

do'huedyo'da kan'pakike'. Kenpa'ti do'taj moknopoika'po pai'da nopo'edik mo'e'apet. <sup>35</sup>Kenpa'da huá'enda e'paknayo Cristoere kurudyo onte'ti nounhuahuahue' o'nika'apo. Do'taj e'nigpeika'ta' on'pakpo huadak hua'a huakka' on'pakpo kenpa'da huá'enda pakhue' o'nepo onte'ti Diosere kenpa'da on'noeonhuahuika'apo. <sup>36</sup>Aya'ada oy katetapi' huakka'ta'da on'eretpakpo on'bae'ika'po do'taj e'nigpeeta' pakhue' o'nepo kenpa'da on'bueyapo. Kurudyo Diosere noeonhuahuikahue'dik o'neapo. <sup>37</sup>Diosere a'noeonhuahuikaya'po katepi' Diostaj yokhue'dik mo'epo kenpa'da do'taj pee'dik mo'ika'ne.

<sup>38</sup>In aratbut dakhuea'da ogkika'po Diostaj nigpeehue' o'nika'po inomey be'api' do'taj e'nokbira'nayo do'hued e'manmadika'taj en'tobira'nayo nogok do huabokerek ijje'po onte'ti ijtiakdepo kenomeytakon ijbakbira'apoy.

Diosya' kurudya' ijhuarakpo Diosa 'urua'nanada megka'nok Diosen huata'monierie 'urua'nanada ijje'po ijtiakapoy. —Jesúsa o'mana'uyate.

**9** <sup>1</sup>—Huakka'nanada Diosen Nokireg on'nopo'toepo Dios Huairitaj daka' on'nigpeika'apo. Kenpa' opudomey huakka'mon bueyhued mo'epo bo'tiahuayapo. Buttida ijjay. —Jesúsa o'mana'uyate.

**Jesús o'eypakatuyate.**

(Mt. 17.1-13; Lc. 9.28-36)

<sup>2</sup>Seis huame'noe e'pokde'te Pedrotaj Jacobotaj Juantere o'batohua'po huakupa kutayo Jesúsa o'batobehukuyate. En'tiahuayte Jesúsén huakok konig niokpo o'kokeypakuyate. <sup>3</sup>Yudtakon diga'da o'takeregpakatupo konig senogda o'etuyate. Aratbutnayo konig keregda kahue'dik o'nika'. <sup>4</sup>Elíastaj Moiséstaj Jesúsere en'batia'pakte on'batiahuay'uyate.

5—Oro' iyoda o'epo huadakda o'ene. Bapa' bak o'kay'. Ontehuapa' nogtida Moiséstaj nogtida Elíastaj nogtida o'kay', Huairi. —Pedroa ona'poda ona'uyate. 6Pedromey digá'da on'mepuke'po koniga' a'ay' Pedroa nopohue'ada oa'uyate. 7Kenpa' ena'te e'sihuija o'batibuk'uyate. E'sihuiya' on'peepo:

—In do'hued Huasi'po me'taene. Huadi'da me'taene. Kentaj yan'nigpeika'. —Diosa o'mana'uyate.

8A'tida en'tiahuayte Jesústayo'da on'tiahuay'uyate.

9Huakupaya' en'huarakde'te —Do huakudaka'da e'bueyada noyhuadhued ee'ted kenda huakupayo huaboa'da bo'tiahuaynig batia'pakhue' yane'. —Jesúsa o'mana'uyate.

10Konigepo kenda batia'pakhue' o'ne'uynig'a huayahuayayo'da kate e'noyhuadtaj Jesúsa ya'batia'pak on'batia'pakuyate. 11Konigepo Jesústaj:

—“Cristo tiakhued ee'ted Elías huakkuruda tiakdik ya'eapet.”  
¿Mena'po Moisés huamanmadika'eri kenda yadika'? —Jesústaj o'nona'uyate.

12—Elfasonigti huakkuruda tiakdik o'epo. Aya'tada a'manopo'yareaya'po yatiakapet. Diosen Huasi'po pai'nada ya'nopo'eapet. Kentaj yan'tibirae'apet. Kenda huaojba'te on'madoya'uyate.

13Elfasonigti e'tiaktada on'tibirae'po konigti on'pakpo dakhuea' ogkame'te. Konig Apagba'a oa'nig ogkame'te.  
—Jesúsa Pedromeytaj o'mana'uyate.

**Huasi'po toto' nokirega  
e'nopo'toqetada Jesúsa o'yarea'uyate.**  
(Mt. 17.14-21; Lc. 9.37-43)

14Jesúsen huanigpeika'erite on'bahua'po okyehued ee'ted huakka'nada e'kupopakada Moisésenba' huamanmadika'eria Jesúsen huanigpeika'eritaj en'maboyte Jesúsomey on'batiahuayato'uyate.

15Jesústaj on'tiahuaydepo on'mepu'kepo on'huaketonyakpo durugteda on'baaka'uyate.

16—¿Katea' yan'batia'pak?  
—O'mana'nok 17nogtiada oa'tokpo,  
—Do'hued huasi'potaj dakhuea' toto' nokirega o'nopo'toenok a'pakhue'dik o'e. 18Kenpa'ti menokapi' e'nopo'toqete o'ketpakonpo barakte o'huekika'po kutajpoa' o'orokika'po hua'id o'idta'peteye'po digá'da o'arognok ontaj o'totiakne. “Dakhue' nokiregtaj ya'noroka',” o'nen huanigpeika'eritaj e'mana'tada orokahue' o'ne, Huamanmadika'eri. —Nogtiada ona'uyate.

19—Opudomey judío aratbut do'taj eknopoe'ta' pakhue' mo'ene. Oknopohue' huae'eri mo'ene. Dios teyda o'epo bayarea'dik o'e oknopohue'da mo'ene. Ijhue'ta'da do'taj moknopoene. Huasi'potaj yan'totiak. —Jesúsa o'mana'uyate.

20Huasi'potaj on'totiaknok dakhuea' nokirega Jesústaj o'tiahuaydepo huasi'potaj o'ketpakonka'nok sorokte o'huekpo, o'pokore'epo o'tiokkutajorokuyate.

21—¿Meniga' huabayoka' dakhuea' nokirega ya'nopo'toika'po ya'ketpakonka'ika'? —Jesúsa ona'uyate.

22—Si'nog ee'ted nogok nogok huakka'da dakhue' nokirega a'araknya'po ta'akyo huahueyopi' o'enika'. Ka'dik ee'nayo oro'taj mo'matinepahui'po bo'tihuapok.  
—Ke'nen paga ona'uyate.

23—Do'taj eknopoe'nayo aya'tada ka'dik ijjeipo yarea'dik ijjei. —Jesúsa ona'nok,

24—Yoknopoey, nogiti nogiti eknopoe' be'tihuapok. —'Utta'da ona'uyate.

25Huakka' aratbut on'kupopaknok Jesúsa o'tiahuaypo,  
—E'peokbet a'pakhue'dikere nokireg yaorokpo huasi'poya' yakhuati' onte'ti

a'kudya'po tiakhue' yae'. —Jesúsa dakhue' nokiregtaj huiyokda ona'nok, <sup>26</sup>dakhue' nokirega o'sagkiadpo o'ketpakogka'po e'bueyonig o'orokpo o'enon'uyate. Konigepo "e'buey o'e," huakka'mon on'batia'pakuynig'a <sup>27</sup>Jesús nayo o'ta'koypo o'boa'uyate. Huasi'po o'bodyate.

<sup>28</sup>Jesús jakyo o'kuduyate. Huanigpeika'eriyo'da kenere o'nepo, —¿Oro'nayo dakhue' nokiregtaj mena'po orokahue' o'e? —Jesústaj o'nona'uyate.

<sup>29</sup>—Bapehue' mo'unhua'po kenpa'ti mo'tiona'pakonhua'po dakhue' nokiregtaj ta'mona'dik mo'ene. —Jesúsa o'mana'uyate.

**"Do'taj me'darakapone." Onte'ti**

**Jesúsa o'mana'uyate.**

(Mt. 17.22-23; Lc. 9.43-45)

<sup>30</sup>Keya' o'hua'po Galileayo konig iregiregteda o'pokonhua'po. <sup>31</sup>Huanigpeika'eritaj o'manmadika'po iregiregteda o'hua'onhua'po. "Do Huabokerek ijjenok Diosa me'ta'mona'uyne. Huabokereka men'bahuatitotiakapet. Men'arakapone. Bapa'me'noe huakudaka'da e'eada ijnoyhuadapoy." Jesúsa o'manmadika'uyate.

<sup>32</sup>Huanigpeika'erinayo kenpa' nopenkahue' o'nepo on'mepakpo "¿monig ya'e?" onahue' o'nuyate.

**"¿Be'a hueret huairida e'dik ya'et?"**

**Huanigpeika'eria on'batia'pakuyate.**

(Mt. 18.1-5; Lc. 9.46-48)

<sup>33</sup>Capernaumyo on'tiakdepo jakyoda o'eato'po,

—¿Dagte o'tiakpo katetaj mo'batia'pak? —Jesúsa huanigpeika'eritaj o'mana'uyate.

<sup>34</sup>"¿Be'a hueret huairida e'dik ya'et?" on'batia'pakpo a'tokhue' o'nuyate. <sup>35</sup>Jesús huanigpeika'eritaj

a'manmadikaya'po o'huadpo "yan'kupopak," o'mana'po,

—Bepi' doere huairi ee'ta' e'paknayo nog aratbuten huanaba'nig ka'nike' konig nogtaj kan'tihuapokike'.

—O'mana'po <sup>36</sup>huasi'potaj o'ta'koypo nopoyo o'totiakpo hua'opite o'doko'uyate.

<sup>37</sup>—Do ijpaknok be'api' in huasi'potaj di'da o'depo o'tihuapokika'po konigda do'takon o'de do'hued Apagtakon o'de. Ke'na me'ta'mona'uyne. —Jesúsa o'mana'uyate.

**Ken aratbut opudomeytaj dakhuea' egka'ta' pakhue' o'nepo daka' bo'tihuapokika'ne.**

(Lc. 9.49-50; Mt. 10.42)

<sup>38</sup>—Nogbokereka o'nendik o'dikka'po toto'taj o'maenika'. O'tiahuaypo oro'ere huahue' o'ika'nok, "Keje, kahue' yae'." Ona'mey, huamanmadika'eri. —Juana ona'uyate.

<sup>39</sup>—Kentaj "kahue' yae'," onahue' yane'. Be'api' konig tiahuayhued o'ika'nig do'hued huadik o'dikka'po eka'nayo onte'ti do'taj dakhue' huaahue'dik o'eapo. <sup>40</sup>Ken aratbuta oro'omeytaj dakhuea' egka'ta' pakhue' o'nepo oro'omeytaj bo'tihuapokne. <sup>41</sup>Cristoen huanigpeika'eri mo'enok do ijpaknok be'api' huamai' hue'ey e'yoknayo dapi' Diosa dakhuapa o'bayokapo. Buttida ijjay. —Jesúsa o'mana'po.

**Keyoj nama'da e'toka'nayo dakhue'da o'unhuahuika'apo.**

(Mt. 18.6-9; Lc. 17.1-2)

<sup>42</sup>—Be'api' do'hued 'uru huaknopoe'eritaj dakhuea' e'batoka'nayo ke'ponanada castiga Diosa ogkadhuahuika'apo. Konigepo do'hued 'uru huaknopoe'eritaj dakhuea' e'batoka'ta' e'paknayopi' dakhuea' batokahued huidtone' ke'nen

huahuerenta' yan'tiontidukupo ta'kotdik a'eya'po jod yakoyo e'kotnayo kenda konig sue'da castiga e'magka' o'e.

<sup>43-48</sup>Huaba'pi' hua'ipi' huakpopi' dakhuea' e'ka' huata'da e'toka'nayo dakhue'nanada o'enok Diosa castiga o'magka'po ta'akyo o'enapo. Ta'ak o'bakpakonhuahuika'apo bakayhue' o'epo. Konigepo huabaapi' hua'ia'pi' huakpoapi' dakhuea' e'toka'ta' e'paknayo dakhue'da o'epo kahue'dik a'eya'po e'boktegnayopi' huadak ya'epet, dakhuea' kahue'dik a'eya'po ekpokotoknayopi' huadak ya'epet. Ken konig yan'nopoepo dakhuea' kahue' yanika'. Dakhuea' eka'nayo Diostaj dakhuea' boka'nok castiga mogkadhuahuika'apone. Ta'akyo mo'bakpakonhuahuika'apone. Bakayhue'dik o'unhuahuika'apo.

<sup>49</sup>Sal pai' e'cada huadakda o'kika'ning konigti pai'da mo'nopo'epo huadakda mo'epone. <sup>50</sup>Sal huadakda o'epo o'kika'. Pai' ehue' ee'nayo huadak kahue'dikda en'dik o'ene. Konig salonig ya'nepo huadaknopo'da huayahuaya di' yan'maepo yan'manoeyika'. —Jesúsa huanigpeika'eritaj o'mana'uyate.

**“¿Huabokerek huato'e'taj menpa' en'dik ya'ne?” Jesústaj nama'da kae'po fariseoa o'nona'uyate.**

(Mt. 19.1-12; Lc. 16.18)

**10** <sup>1</sup>Keya' Jesúsa o'bakhua'po Judeayo kenpa'ti Jordán akodpen huadariyo o'hua'uyate. E'tiakte onte'ti huakka'nanada ogkupopakuyate. Konig o'kika'po o'manmadika'uyate.

<sup>2</sup>Jesústaj a'dikdikya'po sue'da fariseo on'huahua'po, “¿Huabokerek huato'e'taj menpa' kenpa'da endik ya'e?” Jesústaj o'nona'uyate.

<sup>3</sup>—¿Kate yamana'uyate Moisésa? —Jesúsa o'mana'uyate.

<sup>4</sup>—“Huato'e e'en beroba' madoya'dik mo'epo huato'e endik mo'e.” Moisésa o'mana'uyate. —O'nona'uyate.

<sup>5</sup>—Konig nopoteyda mo'ika'po Diostaj e'nigpeika'ta' pakhue' mo'ika'nok Moisésa kenda o'madoya'uynig'a. <sup>6</sup>Huakkuruteda Diosa aya'tada o'ka'uypo huabokerek ettone'ere o'ka'uyate. <sup>7</sup>“Konigepo huabokerek ke'nen hua'oj huayeeretaj okorokpo ettone'taj a'toepakya'po. <sup>8</sup>Botta' e'cada on'toepakdepo konig nogtida o'nede.” Apagba'te kenpa' oa'. Botta' e'cada nogtida o'nede. <sup>9</sup>Kenda Diosa o'toepaka'denok huabokereka enhue'dikda o'ne. —Jesúsa fariseomeytaj o'mana'uyate.

<sup>10</sup>Nogok huanigpeika'eriere jakyoda o'nepo, “¿Huato'e menpa' en'dik o'e?” Jesúsen huanigpeika'eria o'nona'nok,

<sup>11</sup>—Be'api' huabokerek huato'e'taj e'ennayo nogtaj o'toepakpo huakkuru huato'e'taj dakhue'da ogka'. <sup>12</sup>Kenpa'ti ettone'a huato'e'taj e'ennayo nogtaj o'toepakpo dakhue'da o'ka'. Diostaj dakhue'da o'ka'. —Jesúsa o'mana'uyate.

**Jesúsa huasi'potaj o'mationa'pakuyate.**

(Mt. 19.13-15; Lc. 18.15-17)

<sup>13</sup>Jesúsa daka' kan'bake'po huasi'po kentaj en'batotiaktada ke'nen huanigpeika'eria “keje', batotiakhue' yane',” on'mana'uyate. <sup>14</sup>Kenda Jesús o'tiahuaypo o'diyatupo.

—Huasi'po do'te kan'batiake'.

“Kaeya',” manahue' yane'. Konig inomey 'urunopo'da huasi'po o'ne konigti aratbut huaknopo'e'eri Diosensi'po o'nepo Dios Huairitaj on'nigpeika'apo. <sup>15</sup>Huasi'po do'taj 'urunopo'da menoknopo'epo men'nigpeika'ne. Konig huasi'po Dios Huairitaj daka' o'noknopo'ening konigti opudomey oknopo'ehue' ee'nayo Dios Huairiensip'po ehue'dik mo'epone. Buttida ijjay. —Jesúsa o'mana'uyate.

<sup>16</sup>Huasi'potaj o'badokoe'po o'batibata'te'epo Diosa daka' kabake'po o'mationa'pakuyate.

**Huabokerek huairi Jesúsere  
on'batia'pakuyate.**

(Mt. 19.16-30; Lc. 18.18-30)

<sup>17</sup>Dagte Jesúsá huaboá'da o'hua'depo huabokereka o'huaketonyakpo huikudate o'tihuadpo,

—¿Kurudyo Diosere a'noonhuahuikaya'po kate huadakda kika'dik ijje, huadakda huamanmadika'eri? —Jesústaj ona'uyate.

<sup>18</sup>—Ka'tia'po huadakda i'ene ona'. Diosyo'da huadakda o'íka'.

<sup>19</sup>Diosen e'mana' i'nope. Nogen huatoe'taj bakdejhue' yaíka'. Aratbuttaj yahuadiaypo arakhue' yaíka'. Nogen bakberehue' yaíka'. Nama'da bahuaahue' yaíka'. Da ahue' yaíka'. Huaojtaj huayetere daka'da yanigpeíka'po daka' yamatoíka'po yabayokika'. Kenpa' Diosa o'mana'uyate i'nope. —Jesúsá ona'uyate.

<sup>20</sup>—Do huasi'poedanda kenda aya'da ijnigpeíka'uy, Huamanmadika'eri. —Huabokereka ona'uyate.

<sup>21</sup>Jesúsá di' o'epo o'tiahuayatupo, —Nogitied ka'diken i'ene. Huakupete aya'da i'tamaetnig yabahuaya'. Ken huakupe yabaedepo pai'da aratbuttaj yabayoke'. Kenda on eka'nayo kurudyo Diosere huakka'da i'matounhuahuika'apone. Do'taj behuatiakpo beta'hua'íka' e'bueypi' beta'hua'íka'. —Jesúsá huairitaj ona'uyate.

<sup>22</sup>Huairia kenda o'peepo nohue' o'unpo huakka'nanada o'tamaenok suhue'nanada o'epo okhua'uyate.

<sup>23</sup>Huanigpeíka'eritaj okpokuberudpo, —Bepi' huairi huakka'nada e'matoe'ta' huaeretpakeri Dios Huairitaj oknopohue'dik o'neapo. Diosensi'po ehue'dikda o'ne. —Jesúsá o'mana'uyate.

<sup>24</sup>Huanigpeíka'eria Jesúsen hua'ataj o'peepo on'mepuke'nok onte'ti Jesúsá o'mana'po:

—Huakka'da e'matoe'ta' huapakeria Dios Huairitaj oknopohue'dik o'neapo. Diosensi'po ehue'dikda o'ne. <sup>25</sup>Konig camello huaboro' 'uhua sakpi'peyo kudhue'dik o'e. Konigti huairi huakka'da on'matoepo Diosensi'po ehue'dikda o'neapo. —Jesúsá o'mana'uyate.

<sup>26</sup>Huanigpeíka'eria kenda on'peepo huakka'da on'mepu'kepo huayahuaya on'batia'pakpo:

—iKenpihuay! ¿Be'a Diosensi'po e'dik ya'neapo? ¿Be'a Diosere onte'ti noonhuahuika'dik ya'neapo?

—On'batia'pakuyate.

<sup>27</sup>Jesúsá o'batiahuaypo o'mana'po:

—Huabokereka huata'da nopo'yareahue'dik o'ne. O'nada on'pakpo noonhuahuikahue'dik o'neapo. Diosayo'da nopo'yarea'dik o'mae kenpa'ti onte'ti manoeanhuahuika'dik o'mae. Diosayo'da aya'da ka'dik o'e. —O'mana'uyate.

<sup>28</sup>—Oro'nayo aya'da o'matoíka'nig o'maenon'uy. Ontaj ata'huaya'po aya'da o'maenondemey. —Pedroa ona'uyate.

<sup>29</sup>—Aya'ada ke'nen jak kenpa'da o'nen, huama'buytaj huidpotapi' o'nen, huaojtaj huayetapi' o'nen, huatoe'taj huasi'potaj ta'bapi' o'nen. Huadak hua'a o'deretpakpo kenpa'ti do'tayo'da a'nigpeíka'po o'nen.

<sup>30</sup>O'nennok Diosa oy huakka'nanada o'bayokapo. Jak, huama'buy, huidpo, huaye huasi'po, ta'bakon o'bayokapo. Pai'da e'nopo'ebet o'bayokapo. Nogok Diosere on'noonhuahuika'apo. <sup>31</sup>Oy huakka'da huairi e'eadá nogok huairida ehue' o'neapo. Konig huanaba' o'neapo. Huakka'mon konig huairionig ehue'da o'nika'nig konig huanaba'da oy o'nika'nig. Nogoknayo 'urua'da o'neapo. Konig huairitone' o'neapo. —Jesúsá o'mana'uyate.

**“Do'taj me'darakapone.” Jesúsá  
on'te'ti oa'uyate.**

(Mt. 20.17-19; Lc. 18.31-34)

<sup>32</sup>Jerusalényo dagte Jesús huanigpeíka'eri on'behuikpo

Jesús huakkuruda o'hua'enok huanigpeika'eri on'mepuke'po nogomey on'tahua'po on'me'pukuyate. Doce huanigpeika'eritaj nogyonda o'batohua'po konig megka'apone o'mana'po:

<sup>33</sup>—Jerusaléno o'hua'ne. Do huabokerek ijjepe Diosya' ijtiakuy. Jerusaléno huabokereka sacerdote huairiomeytaj men'yokapone. Moisésenba' huamanmadika'eritere men'yokapone. Ken bueydik o'e men'hua'apone. Nog aratbuttaj judío ehue'taj do'taj menyokapone. <sup>34</sup>Nog aratbuta do'taj men'tierikapone. Huiyokda pidetbi'a men'bitbitapone. Mentisupu'eapone. Me'darakapone. Botta'a' e'tisikde'te kubarakyo huakudaka'da e'eme'tada Diosa me'noyhuada'apone. —Jesúsa o'mana'uyate.

**Jacoboa Juanerea huairi bo'yahuea' o'nona'uyate.**  
(Mt. 20.20-28)

<sup>35</sup>Zebedeoen huasi'po Jacobo Juanere Jesústaj on'huahua'po, —Kenda ona'nig oro'taj mogka', huamanmadika'eri. —Juan Jacoboere o'nona'uyate.

<sup>36</sup>—¿Kate bo'pak? —Jesúsa o'mana'nok.

<sup>37</sup>—O'na 'urua'nanada huakhuairi e'ede'te konig huairi e'huae' onte da'kopen ope'topen bohuada'. —Jesústaj o'nona'uyate.

<sup>38</sup>—Kenpa' onahue' mene'. Do pai'da ijnopo'eapoy. ¿Menpa' doere konigti pai'da nopo'e'dik mo'e? —Jesúsa o'mana'uyate.

<sup>39</sup>—Ee', onere pai'da nopo'e'dik o'ey. —Jesústaj o'nona'uyate.

—Buttida ijjay, konig pai'da ijnopo'eapoy opud konigti pai'da nopo'e'dik mo'eapone. <sup>40</sup>Nogok do huakhuairi ijjedepo ijmana'ika'apoy.

Doere huakhuairi ka'ne'po do'huanayo yahueahue'dik o'nene. Kenomey do'hued Apag Dios a'ennada o'baktie'ea'uynigtaj doere huairi o'bayahuea'apoy. —Jesúsa o'mana'uyate.

<sup>41</sup>Nog diez huamata'moneria kenda on'mapeepo Jacobotaj Juanere on'mahuadiay'uyate.

<sup>42</sup>—Inte yan'batiak —Jesúsa o'mana'po— Nog aratbuten gobierno huairitone' kenpa'da teyda on'mana'ika'nok kenomeyen aratbut huairitaj nigpeika'dik o'nika'. <sup>43</sup>Opudnayo ken konig kikahue'dik mo'ene. Be'api' huairi ee'ta' e'paknayo nog aratbuttaj kan'batihuapokike'. <sup>44</sup>Kenpa'ti be'api' doere huairi ee'ta' e'paknayo konig nog aratbuten huanaba' ka'nike'. <sup>45</sup>Konig do ijkika'nig konigti yag'kika'. “Konig huanaba' mentihuapok.” A'ikaya'po tiakhue' ijjuy. Aratbuttaj a'tihuapokya'po ijtiakuy. Aratbuten dakhuea' e'ka'taj a'bakkahueaya'po a'manigbueyya'po Apag Diosya' ijtiakuy. —Jesúsa o'mana'uyate.

**Bartimeotaj okpoyarea'uyate.**  
(Mt. 20.29-34; Lc. 18.35-43)

<sup>46</sup>Ken Jericó huakka' jakyo on'batiakuyate. Huakka' jakya' on'pokondepo Jesús huanigpeika'eriere huakka'nanada aratbutere e'norokte Bartimeo ekpobig Timeoen huasi'po dagte o'huadpo “huakupe beyok,” o'mana'uyate. <sup>47</sup>“Jesús Nazaret huae'eri o'pokde,” aratbuta enhuaa'te o'peepo 'utta'da ona'po,

—Metinepahui', Jesús Daviden adhuea' huasi'po. —Ekpobiga 'utta'da ona'uyate.

<sup>48</sup>—Yabatikde'. —Aratbuta huiyokda e'nona'tada nogiti huakka'a'da o'nokoye'uyate.

—Metinepahui', Jesús Daviden adhuea' huasi'po. —'Utt'a'da ona'uyate.



<sup>49</sup>Ken Jesús e'hua'ada o'boato'po,  
—Yan'totia. —Jesúsa o'mana'nok  
on'huahua'depo,

—Yadurugpakpo yabod. Jesús a  
"Yatiak" mena'ne. —O'nona'uyate.

<sup>50</sup>Huaok o'enpo o'bodpo Jesústaj  
o'huatiakuyate.

<sup>51</sup>—¿Kate i'pak? —Jesúsa ona'uyate.  
—Ekpoyarea'ta' i'jpaki,  
Huamanmadika'eri. —Ekpobiga  
ona'uyate.

<sup>52</sup>—Do'taj meknopoepo yayarudpo  
yahuati'. —Jesúsa ona'uyak ekpobig  
huaboa'da o'tiahuaypo Jesústaj dagte  
o'tahua'uyate.

**Jerusalényo Jesús a o'kuduyate.**

(Mt. 21.1-11; Lc. 19.28-40; Jn. 12.12-19)

**11** <sup>1</sup>Jerusalén meyhue'da e'ede'te  
Betfagéte kenpa'ti Betaniate  
kenpa'ti ote' Olivoste o'nedepo, botta'  
huanigpeika'eritaj:

<sup>2</sup>—Butukda yan'huati'. Huakka'  
jaky o yan'huati'. Keyo burro 'uhua  
enuku' bo'huahuayapone. Ken burrote  
bepi' huadhued o'ne. Yanogkujpo  
do'taj menigtotia. <sup>3</sup>“¿Mana'po  
bo'tohua'?” Be'api' ena'nayo “Huairia  
o'paknok o'kay. Huaboa'da onte'ti  
o'totia kapoy.” Ya'nonati'. —Jesúsa  
botta' huanigpeika'eritaj o'mana'uyate.

<sup>4</sup>Ken on'hua'po dagte akbopete  
burro 'uhua enuku' on'huahuaypo  
o'nogkujuyate.

<sup>5</sup>Egkujte huabokerek kenteda o'nepo,  
—¿Kate boka'? ¿Mena'po burrotaj  
mogkuj? —On'mana'uyate.

<sup>6</sup>Konig Jesús a o'mana'nig  
kenda on'mana'nok “tohua'dik  
mo'e,” on'mana'uyate. <sup>7</sup>Jesús  
burrotaj on'tohua'po kenomeyen  
huakka' burrotaj pite on'huada'nok  
Jesús o'huaduyate. <sup>8</sup>Kente Jesús  
o'pokapo on'nopoepo dagte  
huakka'da kenomeyen yudtaj  
on'bahueda'po nogomeya ohuey

opi ba'kutaj on'baktega'depo dagte  
on'bahueda'uyate.

<sup>9</sup>Huakkurute huag'eria kenpa'ti  
huata'poeria aya'ada huaboa'da 'utta'da  
on'da'po:

—'Urunanada Jesús, Diosen  
huamanopo'yarea'eri, mon'durugpak,  
huakka' mon'durugpak. Kentaj Apag  
Diosa mo'nigta'mona'uyne. <sup>10</sup>Oro'en  
adhuea'pane' David huairionig  
hueretda huakhuairi o'tiakde,  
Jesús Huairi o'tiakde. Dakiti Dios,  
mon'durugpak, huakka' mon'durugpak.  
—Aratbuta 'utta'nanada o'nokoy'uyate.

<sup>11</sup>Ken konig Jerusalényo Jesús  
o'kudpo kenpa'ti Diosen jakyo o'kudpo,  
aya'tada daka' o'tiahuaypo osikdenok  
Betaniayo doce huamata'moneriere  
o'hua'uyate.

**Hueymey higerataj “onte'ti  
dapakhue'dikda i'epone,” Jesús a  
ona'uyate.**

(Mt. 21.18-19)

<sup>12</sup>Eme'te Betaniaya' o'norokdepo  
Jesús aypota' o'epo <sup>13</sup>adteda hueymey  
higerataj o'tiahuaynig'a huada  
o'pakpo o'huahua'nig'a huakutayo'da  
o'uyate. Huadajok ehued o'uyate.

<sup>14</sup>Konigepo higerataj ona'po:

—Onte'ti dapakhue'dikda  
i'epet. Bepi' o'nenda bapehue'  
ya'neapet. —Jesúsa ona'uyate. Kenda  
huanigpeika'eria on'pee'uyate.

**Diosen jakya' huabahuaya'eritaj  
o'maen'uyate Jesús a.**

(Mt. 21.12-17; Lc. 19.45-  
48; Jn. 2.13-22)

<sup>15</sup>Onte'ti Jerusalényo on'tiakdepo Jesús  
Diosen jakyo o'kuddepo huaboa'da 'uhua  
huabahuaya'eritaj huabakbae'erieretaj  
o'maoroka'po huakupe huakabia'erien  
kutopa o'makmaena'po tukku' 'uhua  
huabahuaya'erien huahuadtaj  
o'makmaena'uyate. <sup>16</sup>“Konig dag ekapa'



Diosen jakyo katapi' topokhue'dik mo'ene." Jesúsá ihhua'da o'mana'uyate. <sup>17</sup>O'manmadika'po:

—Do'hued jak aya' huadarieri aratbuten huationa'pak jak on'tae. Apagba' e'mana'tada konig huabereerien jakonig opudomeya mo'toene. —Jesúsá huabahuaya'eritaj o'mana'uyate.

<sup>18</sup>Kenda sacerdote huairi Moisésenba' huamanmadika'eri on'peepo Jesústaj on'me'pukuyate. Jesúsá e'manmadika'te huakka'nanada aratbut on'peepo 'urunanada o'e on'mepuke'nok huairia Jesústaj on'me'pukpo huabo'ada e'arakta' on'pakpo monig e'arakta' o'duknig'a.

<sup>19</sup>Esikde'te Jesúsá huakka' jakya' o'oro'kuyate.

#### Hueymey higuera o'ay'uyate.

(Mt. 21.20-22)

<sup>20</sup>Eme'te sikyoedda onte'ti on'hua'depo higuera hua'ihuitya' aya'ada e'ayde' on'tiahuay'uyate. <sup>21</sup>Pedro onte'ti okkahuehue' o'epo,

—Ken higerataj "onte'ti dapakhue'dikda" iname'nig o'ayde, yatiahuay', huamanmadika'eri. —Ona'uyate.

<sup>22</sup>—Diostaj daka' yanoknopoe'. <sup>23</sup>"In ote' yatohua', Dios. E'pogyo yaen." Be'api' ena'nayo Diosa yaka'apet daka' eknopoe'nayo o'ka'apo. Konig ona'nig o'eapo. <sup>24</sup>Eknopoe'nayo aya'tada katapi' bo'pakpo bo'tiona'paknok Diosa bo'yokapone. <sup>25</sup>Apag Diostaj yan'tiona'pakpo be'api' ontaj dakhuea' egkame'nayo yakkahuea'. O'nen Apag Dios kurudyo o'ika'po ke'na opudtaj dakhuea' e'ka' bokkahueapone kenpa'ti. <sup>26</sup>Nogtaj okkahueahue' ee'nayo o'nen Apag Diosakon opudtaj okkahueahue' mo'eapone. —Jesúsá o'mana'uyate.

#### ¿Be'a Jesústaj ya'ta'mona'uyate?

(Mt. 21.23-27; Lc. 20.1-8)

<sup>27</sup>Onte'ti Jerusalényo on'tiakdepo Jesúsá Diosen jakyo e'huae'te sacerdote

huairi Moisésenba' huamanmadika'eri judfo huairitone'ere on'huahua'depo,

<sup>28</sup>—¿Yabayareadhuati'. Be'a mena'uy? —Jesústaj o'nona'uyate.

<sup>29</sup>—Huakkuru do'taj me'nakonon.

Opud ena'nayo ke'na "yabayarea'," mena'uyne do kenpa'ti o'nona'apone.

<sup>30</sup>"Bautiza yamagkadhuati'."

¿Be'a Juantaj yana'uyate, Diosa huabokerekapi'? Mena'tok. —Jesúsá o'mana'uyate.

<sup>31</sup>Menpa' o'apo huairia huayahuaya on'batia'pakpo:

—"Diosa Juantaj o'ta'mona'uyate."

Oro'a ena'nayo "¿kenda Juana do'taj be'tia'pakikuynig mena'po oknopoehue' mo'uy?" oro'taj mona'apone. <sup>32</sup>"Huabokereka Juantaj on'ta'mona'uyate." Oro'a ena'nayo aratbuta oro'taj dakhue'da mogka'apet konigepo Diosen huamanbatia'pakero

Juan o'e'uy aratbut o'noknopoenok.

—Judfo huairia huayahuaya

on'batia'pakpo,

<sup>33</sup>—Be'a Juantaj yanuyet oro' nopoehue' o'ey. —Huairia Jesústaj o'nona'uyate.

—"Yabayarea'." Ke'na mena'uyne do kenpa'ti onahue' o'neapone. —Jesúsá o'mana'uyate.

**Huairien ta'ba huatatoe'eria dakhuea'da on'taka'uy. Ken konig Jesúsá o'manbatia'pakpo o'manmadika'uyate.**

(Mt. 21.33-46; Lc. 20.9-19)

**12** <sup>1</sup>Jesúsá konig o'e o'manbatia'pakpo o'manmadika'po:

—Huairien ta'bayo uva huakpi on'batuke'uy. Uva setda huada huakpi on'batuke'uy. On'tiokpaka'uy. Uva huada huasapa'a' sipana' uruda o'kogka'uy. Hua'ia asapaiya'po o'kogka'uy. Ta'ba huatioka' kutayoda kutopa o'ka'uy. Uva ta'ba

huatatoe'eritaj ta'ba o'baktoyokdepo bidteda nogbayo huairi o'bakhua'uyate. Nogbayo ijhue'da o'uyate. <sup>2</sup>Kenoka' uva huada o'boyogdenok ta'bayo ke'nen huanaba' o'ta'mona'uyate. Sue'da huada ka'totiake'po o'ta'mona'uyate. <sup>3</sup>E'tiakde'te ta'ba huatatoe'eria huairien huanaba'taj on'toepo on'bitbitpo uvabayo' on'ta'mona'uyate. <sup>4</sup>Onte'ti huairia nog huanaba'taj o'ta'mona'uyate. Ta'bayo e'tiakde'te on'pa'ea'po huakutaj on'bitbitpo on'tidike'uyate. <sup>5</sup>Huairia nogtakon o'ta'mona'uyate. Kentaj o'darakuyate. Nogok nogomey huakka'montaj o'mata'mona'uyate. Nogtaj on'mabitbitpo konogtada on'batiarakuyate.

<sup>6</sup>Huairien huasi'poyo'da o'taepo kentaj di'nanada o'ika'uyate. Ta'poteda huasi'po o'ta'mona'uyate. Kentanayo 'urua'da yan'deapet o'nopoepo. <sup>7</sup>Ta'ba huatatoe'erinayo dakhuea'da on'nopoepo, "Huairi e'bueyde'te huasi'poa aya' huaoen o'baeapo. On'nopoepo huairien ta'ba oro'en kenpa'da mo'tae'po huasi'potaj mon'arak." Onpayo' on'batia'pakuyate. <sup>8</sup>Ken huasi'potaj on'toepo o'darakpo ta'baya' huaso' o'nen'uyate. —Ken konig Jesúsa o'manbatia'pakpo o'manmadika'po,

<sup>9</sup>—Huairi o'tiakdepo huatatoe'eritaj menpa' ya'magka'apet mo'nopoepo. Huatatoe'eritaj o'barakpo ta'ba nogomeytaj o'bayokapo. <sup>10</sup>Apagba'kon tiahuahue' mo'ika'.

Huid jak ogka'po jak huaka'eria Diosen 'uru huida e'huae'taj pakhue' o'nepo o'nen'uy. Ken huida' Diosnayo o'pak ken huida' huaboro' jakda o'ka'apo.

<sup>11</sup>Kenda Dios Huairia o'ka'apo 'urudapita' o'ka', o'nopoene. Apagba'te kenda oa'.

—Jesúsa o'mana'uyate.

<sup>12</sup>Judío sacerdote huairi nog judío huairiere Jesústaj on'peedeпо oro'omeytaj bo'tia'pakne. Oro' konig huairien ta'ba huatatoe'eri o'nea' bo'tia'pakne on'nokotdepo Jesústaj huabakuda' jakyo e'tohua'ta' on'tipaknig'a aratbuttaj on'makme'pukpo tohuahue' o'nyate. Jesús Diosen huamanbatia'pakeri o'e. Aratbuta o'noknopoenok on'makme'pukpo on'bakhua'uyate.

**¿Menpa' Romano gobierno huairitaj huakupe yokdik o'e? Fariseoa o'nona'uyate.**

(Mt. 22.15-22; Lc. 20.20-26)

<sup>13</sup>Jesúsa nama'da kae'po dakhue'da oa' aa'ya'po judío huairia Jesúste fariseotaj kenpa'ti Herodesen huapakeritere on'mata'mona'uyatenok <sup>14</sup>on'huatiakpo, —Konig aratbuta yan'pakapet mentia'pakapetpi' nopoehue' i'epo buttida i'mana'ika', huamanmadika'eri. Aya'tada konigti i'pakika'. Huairi huanaba'pi' konigti i'pakika'. Diosen e'kika'nig buttida i'manmadikika'. ¿Menpa' Romano gobierno huairitaj huakupe yokika'dik o'e? ¿Yokhue'dikpi' o'e? —Jesústaj o'nona'uyate.

<sup>15</sup>Nama'da me'nona'ne Jesúsa o'nopoepo, —¿Do dakhuea' kae'po mena'po nama'da o'nona'? Men huakupe, mentiahuae'. —Jesúsa o'mana'uynok, <sup>16</sup>ken denario huakupe e'yokte o'tiahuaypo,

—¿Huakupete be'ed huakok ya'e? ¿Be'ed huadik e'mandoya' ya'e? —Jesúsa o'mana'uyate.

—Romano gobierno huairien huakok huadikere o'e. —Jesústaj o'nona'uyate.

<sup>17</sup>—Gobiernoen e'huae' yan'yokikati'. Kenpa'ti Diosen e'huae' yag'kika'po yan'yokikati'. —Jesúsa o'mana'uyate.

Kenpa' on'peedeпо, "kenpihuay," 'urua'da oa' on'nopoepo.

**¿Menpa' aratbut kubarakya'  
noyhuaddik ya'neapet?**

(Mt. 22.23-33; Lc. 20.27-40)

<sup>18</sup>Saduceo huamanmadika'eri aratbut kubarakya' onte'ti noyhuadhue' o'neapo on'batia'pakika'uy. Saduceomey Jesústaj on'huahua'po o'nona'po:

<sup>19</sup>—“Huabokerek e'toëpakada huasi'po toëhuedada e'bueynayo ke'nen huama'buy ayhuataj toëpakdik o'ëpo huama'buykudakendik huasi'po diktoëdik o'ë.” Moisésa o'manigmadoya'uyate. <sup>20</sup>Oro'ere siete huama'buy o'nuy. Huakkurueria o'toëpakdepo nogok sigpi' huasi'po toëhue'ada okbuey'uy. <sup>21</sup>Nog huama'buy ayhuataj o'toëpakuy. Ke'nakon huasi'po toëhue'ada o'buey'uy. Nogakon konigti o'ka'uy. <sup>22</sup>Ken konig aya'ada siete huama'buye kentaj on'toëpakuy. Huasi'po toëhue'ada on'timabuey'uy. Ta'pota' ayhuakon o'buey'uy. <sup>23</sup>¿Nogok aratbut kubarakya' onte'ti en'noyhuadde'te ke'na ayhua be'ed huatoëa'taj ya'ëapet? Aya'ada huama'buya on'toë'uy, huamanmadika'eri. —Saduceomeya Jesústaj o'nona'uyate.

<sup>24</sup>—Nama'da mo'nopoika'ne. Apagba' nopoëhue' mo'ene kenpa'ti Dios teyda o'ë nopoëhue' mo'ene. <sup>25</sup>Aratbutkudak kubarakya' on'noyhuaddepo toëpakhue'dik o'neapo kenpa'ti huayöbu katöepake'po bayokhue'dik o'neapo. Konig Diosen huata'moneri kurudyö o'ne konigti o'neapo. Diosen huata'moneri toëpakhue' o'nika'.

<sup>26</sup>Aratbut e'buey onte'ti kubarakya' noyhuadhue' ya'neapet opud nama'da on'batia'pakika'nig'a kubarakya' onte'ti on'noyhuadapo nopoëdik mo'ene. Moisésenba'te bo'tiahuaypo kenpa' nopoëdik mo'ene. Kente Moisésenba'te hueymey e'bakpakte

Moisésa Diostaj o'tiahuay'uy o'timadoya'uyate. “Abrahamen Dios ijjeý. Isaacen Dios ijjeý. Jacoben Dios ijjeý.” Diosa ona'uyate. <sup>27</sup>E'bueyen Dios ehue' ee'tada huanoe'erien Dios o'jka'. Aratbut noyhuadhue' o'neapo opud nama'da mo'nopoika'ne. —Jesúsa o'mana'uyate.

**Diosen e'mana' menata hueretda  
inigpeëpo kika'dik ya'ë.**

(Mt. 22.34-40)

<sup>28</sup>Jesús saduceo huairiere en'batia'pakte Moisésenba' huamanmadika'eri o'bahuatiakpo o'mapeëpo Jesúsa 'uruda o'mana' o'nopoëdepo,

—Diosen e'mana' menata hueretda inigpeëpo kika'dik ya'ë. —Jesústaj Moisésenba' huamanmadika'eria ona'uyate.

<sup>29</sup>—Huairi oro'en Dios kenyo'nanada Dios o'ë. Yan'pëe', Israel aratbut.

<sup>30</sup>Dios Huairitaj di'nanada yanika'. Huanopo'abeta' huakka'da yan'pakpo Diostaj di' yanika'. Huaso'abeta' huakka'da yan'pakpo Diostaj di' yanika'. Huanokiregabeta' huakka'da yan'pakpo Diostaj di' yanika'.

E'nopoika'a yan'eretpakpo Diostaj di' yanika'. Kenda Diosen e'mana' menata hueretda inigpeëpo kika'dik ya'ë.

<sup>31</sup>Diosen ta'pota' e'mana' konigtimon o'ë. “Konig huata' di'da mo'jka'ne konigti nog aratbuttaj di'da yan'maika'.” Kenda e'mana' Diosa huakka'nanada o'pakika' nogda sue'da o'pakika'. —Jesúsa ona'uyate.

<sup>32</sup>—'Urunanada ona'ne, huamanmadika'eri. Buttida ona'ne. Nogtiyo'da Dios o'ë. Nogda ehue' o'ë.

<sup>33</sup>Dios Huairitaj di'nanada yanika'. Huanopo'abeta' huakka'da yan'pakpo Diostaj di' yanika'. E'nopoika'a yan'eretpakpo Diostaj di' yanika'. Huaso'abeta' huakka'da yan'pakpo

Diostaj di' yanika'. Huanokiregabeta' huakka'da yan'pakpo Diostaj di' yanika'. Kenpa'ti konig huata' di'da mo'ika'ne konigti nog aratbuttaj di'da yan'maika'. Kenda Diosa huakka'nanada o'pakika'. 'Uhua Diostaj on'yokika'po Diostaj kutopate on'mahuigika' Diosa sue'da o'pak. —Moisésenba' huamanmadika'eria ona'uyate.

<sup>34</sup> Moisésenba' huamanmadika'eria daka' oa'nig Jesúsa o'peepo, —Dios Huairitaj oknopoe'dik i'ene. Diosensi'po e'dik i'ene. —Jesúsa ona'uyate. Kenda enade'te onte'ti Jesústaj onahue' o'nuyate.

**¿Be'ed adhuea' huayayo ya'e Cristo?**  
(Mt. 22.41-46; Lc. 20.41-44)

<sup>35</sup> Diosen jakyo Jesúsa o'manmadika'po: —Cristo Daviden adhuea' huayayo o'e. Mena'po Moisésenba' huamanmadika'eria yada'ika'.

<sup>36</sup> Doere teyda yamanika'. Aya'da o'nen taka' oknopoehue' huae'erikon nogokda huaboada ontaj nigpeika'dik o'neapo. Do'hued huairi Cristotaj Dios Huairia ona'uy.

A'ennada Davida Diosen Nokireg o'nopo'toepo oa'uyate. <sup>37</sup> “¿Do'hued Huairi Cristo o'e,” David ea'nayo Cristo Daviden adhuea' huayayo menpa' e'dik ya'e? —Jesúsa o'mana'uyate.

Ken huakka'ada aratbut ogkupopakpo durugnanada on'pee'uyate.

**Moisésenba' huamanmadika'eritaj Jesúsa o'batia'pakuyate.**  
(Mt. 23.1-36; Lc. 11.37-54; 20.45-47)

<sup>38</sup> Jesúsa nogiti o'manmadika'po: —Moisésenba' huamanmadika'eritaj keyoj ijJay. Huata'da on'eretpakpo nama'da ogkika' daka' yan'nopoika'.

Konig huairi kirigayo' huabidokda e'otta' on'pakika'po kenpa'ti huakka' jak eretnopoyo e'huae'te “I'tiak, huairi,” ena'te e'peeta' on'pakika'. <sup>39</sup> Kenpa'ti judíoen huaitake' jakyo huairied huahuadte e'huadta' on'eretpakika'. Kenpa'ti fiestate konig huairied huahuadte e'huadta' on'eretpakika'. <sup>40</sup> Kenpa'ti ayhuan huakupe jakpi' katepi' en'tae'te konig engaña ogka'po on'bakkayika'. Kenda ogkika'po onokteteyo' Diostaj ijhue'da on'tiona'pakonhuahuika'. Aratbuta men'tiahuaye'po huadakda o'ne men'tinopoe'po kirigayo' on'tiona'pakonhuahuika'. Kenda ogkika'nok Diosa daka' o'nopoe'po huakka' castiga o'magka'apo. —Jesúsa o'mana'uyate.

**Ayhua pai'da e'eada Diostaj botta' sigkupe o'yokuyate.**  
(Lc. 21.1-4)

<sup>41</sup> Diosen jakyo huakupe huabae' cajate meyhue'da Jesúsa o'huadpo huakka' aratbut huakupe en'kuda'te o'batiahuay'uyate. Huairia huakka'da on'kuda'uyate. <sup>42</sup> Pai'da ayhua o'tiakdepo botta' sigkupe o'bakuda'uyate. <sup>43-44</sup> Huanigpeika'eritaj “yan'tiak” o'mana'po,

—In ayhua suhuigda e'toeada konig huakka'da o'kuda'. Judío huairinayo huakka'da e'tamaetada suigda on'kuda'. Konigepo ayhua aya'da Diostaj o'yok. Buttida ijJay. —Jesúsa o'mana'uyate.

**Diosen huid jak aya'nada on'baksaka'apo. Jak ehue'da o'eapo.**  
(Mt. 24.1-2; Lc. 21.5-6)

**13** <sup>1</sup> Diosen jakya' Jesúsa e'orokde'te, —Diosen jak yatiahuay', huamanmadika'eri, 'urunanada huid, 'urunanada jak. —Nogtida huanigpeika'eria Jesústaj ona'uyate.

<sup>2</sup>—In Diosen huid jak bo'tiahuaynig nogok aya'da huid on'sakapo. Huabada sorokte nog aratbuta on'saka'apo. Huid kupahuihuihue' o'ēapo. Diosen jak ehue'da o'ēapo. —Jesúsa ona'uyate.

**Cristo onte'ti tiakhued eē'ted kenpa'ti kene'huayá' huame'noe tiakhued eē'ted in konig aratbuta on'magkika'aponig Jesúsa o'manopoēá'uyate.**

(Mt. 24.3-28; Lc. 21.7-24; 17.22-24)

<sup>3</sup>Ken Olivos ote'yo Diosen jakya' butukada on'hua'uyate. Jesús e'huadte Pedro Jacobo Juanereyo'da on'huahua'po,

<sup>4</sup>—¿Menoka' Diosen huid jak yan'sakapet? ¿On onte'ti e'tiak kenpa'ti kene'huayá' huame'noe menoka' ya'ēapet? ¿Oro'omey a'nopoēya'po kate huakkuru o'tiahuayapet? —Jesústaj o'nona'uyate.

<sup>5</sup>—Keyoj huakka'ada opudtaj nama'da ena'te peehue' yanikati'.

<sup>6</sup>Huakka'ada opudtaj bo'huatiakapone. “Cristo ijjej.” Do'hued huadik nama'da mona'apet. Kenomeytaj huakka'ada nama'da on'manigpeēapo.

<sup>7</sup>Nogbayo nogbayo gobierno sorotataj nog gobierno sorotataj on'barakonhua' yan'batia'pakapet. Opudnayo me'pukhue' yane'. Kene'huayá' huame'noe tiakhued eē'ted. <sup>8</sup>Nogbaya' nogbaya' gobierno sorotataj yan'barakonhuahua'apet. Diga'da yan'barakonhuahua'apet. Nogbaya' nogbaya' huadari ya'iyegapet. Nogyá' nogyá' aratbut aypobayo' o'nepo yan'mabueyonhua'apet. Kenpa' huaboa'da dakhuea'da o'ēdepo pai'nanada yan'nopo'ēapet.

<sup>9</sup>Huata'da daka' yan'nopoēpo do'taj batikhue'da yanoknopoika'. Judío huairi egkupopakyo mo'batohua'apone. Judíoen huaitake' jakyo mo'bitbitapone. Do'taj moknopoēnok do'hued gobierno

huairitaj manbatia'pakdik mo'ēapone. <sup>10</sup>Kene'huayá' huame'noe ehued eē'ted aya'da huadaribayo huag'eritaj e'noeanhuahuika' hua'a huadak hua'a manbatia'pakdik ya'neapet.

<sup>11</sup>Gobierno huairitaj e'yokde'te “katia'pi' huairitaj yan'batia'pakapo,” me'pukhue' yane'. Kenoka' Diosen Nokirega mo'nopoēa'aponok kenda huairitaj mo'mana'apone. <sup>12</sup>Nogok oknopoēhue' huag'eria huaknopoē'eri huama'buytaj kan'batiarake'po gobierno huairitaj on'bayokapo. Kenpa'ti huaoa huasi'potaj kan'batiarake'po gobierno huairitaj on'bayokapo. Kenpa'ti huasi'poa ke'nen huaoj huaknopoē'eritaj kan'batiarake'po gobierno huairitaj on'bayokapo. <sup>13</sup>Do'taj moknopoika'nok nogba nogbaya' huabada opudtaj bo'huadiayika'apet. Kenomey batikhue'ada Diostaj daka' on'nigpeika'po Diosere on'noeonhuahuika'apone.

<sup>14</sup>Ken dakhue'da Diostaj konig Diosen jakyo ya'kudapet. Daniela a'nenannda o'madoya'uyatenig Diosen jakyo e'ēde'te bo'tiahuaydepo aya' Judea huadaribayo huag'eria huakupayo yan'mamonti'. Beroba' yan'bona'pakpo yan'nopoenkati'. <sup>15</sup>Huabarakeri idada on'batiaknok jak kurute eē'nayo jakyo katepi' mo'tamae a'udya'po kudhue' yaneti'. Idada yan'mamonti'. <sup>16</sup>Ta'bayo e'ne'nayo yudtaj a'udya'po jakyo huahue' yaneti'. <sup>17</sup>Ettone' bogdakhue' kenpa'ti ettone' yobed on'toēpo idada monhue'dik o'nepo pai'da yan'nopo'ēapet. <sup>18</sup>Uu'ok eē'te monhue'dik o'ey Diostaj yan'tionapakikati'. <sup>19</sup>Huakka'nanada pai'nanada yan'nopo'eonhuahua'apet. Ke'ponanada ya'neonhuahua'apet. Huakkuruda Diosa huadari e'ka'deya' sue'da pai'damon on'nopo'ē'uyate. Kenpa' ehue' ya'neapet. <sup>20</sup>Aya'da

mabueyhue'dik ka'ne'po, kenpa'ti Diostaj huaknopoe'eri Diosen huabaktie'ea'eritaj o'matinepahui'po "sue'da huame'noe aratbut pai'nananada kan'nopo'unhuahuike.'" Diosa ya'aapet.

<sup>21</sup>Kenoka' "yan'tiahuay', in Cristo o'e," "yan'tiahuay', ayo Cristo o'e." Be'api' ena'nayo peehue' yaneti'.

<sup>22</sup>Kenpa'ti "Cristo ijje'y," huabokerekpi' nama'da yan'mana'apet. "Diosen huamanbatia'pakari ijje'y," nogok nogok nama'da yan'mana'apet. Kenpa'ti 'urua'da konig Diosayo'da ka'dik o'eni yagka'apet. Kenpa'ti yan'bayarea'apet. Diosen huabaktie'ea'eri nama'da kagke'po yan'eretpakpo nama'da yan'mana'apet. <sup>23</sup>Nama'da huaa'eritaj keyoj ijjay. Engaña huaa'eri tiakhued ene'ted daka' on'nopea'ne.

**Kurudya' Jesucristo o'huarakapo.**

(Mt. 24.29-35, 42-44; Lc. 21.25-36)

<sup>24</sup>Kenpa'ti nogok pai'da en'nopo'ebatikde'te niokpoakon sigpi' ta'tehue'dikka ya'epet konigti puugkon jeyhue'da ya'epet. <sup>25</sup>Kurudya' siokpo ya'kahuapet. Kurudyo huae'eri huairinig yan'iriga'apet. <sup>26</sup>Do e'tiakte men'tiahuayapet. Kurudya' e'sihuiya' teynanada ijje'po 'urua'nanada ijje'po ijhuarakapoy. <sup>27</sup>Do'hued ángeltaj ijmata'mona'apoy. Nogyon nogyon do'hued huabaktie'ea'eritaj on'bakupopaka'apo. Aya'baya'da aya' kurudbaya'da on'bakupopaka'apo.

<sup>28</sup>Higuera hueymeytaj ijmanbatia'pakapoy. Kenda daka' yan'nopoe'. Hua'opi o'kuta'sonpakde o'bakutapakde huabayok o'tiakde mo'nopoika'. <sup>29</sup>Kenda kenpa' huabo'a'da ijja'nig e'ede'te bo'tiahuaydepo do Diosen Huairi kurudya' o'tiakdeapo nopoe'dik mo'ene. <sup>30</sup>Opu'd aratbut aya' bueyhued opuden huakka' jaktaj taka' sorotataa ke'poda mogka'apet. <sup>31</sup>Do'hued hua'a

do'hued e'manmadika'nayo kenpa'da o'unhuahuika'apo. Batikhue'dik o'epo. Huadarinayo batikdik kurudkon batikdik do'hued e'mana'nayo batikhue'dikka o'epo.

<sup>32</sup>Ken huame'noe o'tiakapo, kente niokpo e'huadte o'tiakapo aya'ada be'api' nopoe'hue'da o'ne. Diosen huata'moneripi' kurudya' nopoe'hue' o'ne. Do Diosen huasi'po itipi' nopoe'hue' ijje'y. Apag Diosayo'da o'nopoe'.

<sup>33</sup>Keyoj Diosen daka' yag'kikati'. Kenoka' o'tiakapo nopoe'hue' mo'enek batikhue'da do e'tiakapote ekpoe' yanikati'. <sup>34</sup>Konig huairi nogbayo a'ti o'hua'deapopo ke'nenda huanaba'taj daka' o'mana'po, "jak daka' mentatōika', daka'da yag'kikati', akbogpe huatoe'eri daka' ekpoe' yanikati'. <sup>35</sup>Kenoka' jak huairi o'tiakapo nopoe'hue' mo'epo baysik nopote sikyo meahued sikyoeddapi' yatiakapetpi' yan'nopoe'po daka' ekpoe' yanikati'. <sup>36</sup>E'tayde'tepi' yatiakapet yan'nopoe'po daka' ekpoe' yanikati'." Huairia huanaba'taj o'mana'uy. <sup>37</sup>Opu'domeytaj ken konigti aya'tada ijmanay. Daka' ekpoe' yanikati' ijmanay. —Jesúsa o'mana'uyate.

**Jesústaj a'arakya'po monig o'totiakapo judío huairia on'batia'pakuyate.**

(Mt. 26.1-5; Lc. 22.1-2; Jn. 11.45-53)

**14** <sup>1</sup>Eme'tekenta' biahue' pan huape' fiesta o'epo. Jesústaj monig iregireg a'arakya'po huatotiak on'ukpo,

<sup>2</sup>—Fiesta ee'te arakhue'dik o'ene. Kenoka' e'araknayo aratbut mo'huadiaypo 'utta'da boy'dik mo'epone. —Huairia on'batia'pakuyate.

**Ettone'a' uru'huie'ada huasihua' Jesústaj o'kutioy'uyate.**

(Mt. 26.6-13; Jn. 12.1-8)

<sup>3</sup>E'si'dakset Simóntaj on'dikka'uyate. O'sidakyare'uyate. Betania huakka'

jakyo Simónen jakyo Jesús mesate e'huadte ettone' o'kudonpo huid yerepu'te 'uru'huieḡada huasihua'a huakka'teda ee'tada o'totiakpo Jesústaj o'kutioy'uyate. <sup>4</sup>Sue'ada on'tiahuaydepo on'huadiayonpo, —Mena'po huakka'teda ee'tada nama'da injoy. <sup>5</sup>Pai'da aratbuttaj kabayoke'po onjoyhued ee'ted huakka'teda bahuaya'dik o'eyay'nig'a. —Huayahuaya on'batia'pakpo.

—Nama'da i'ka'. —Ettone'taj o'nona'uyate.

<sup>6</sup>—In ettone'taj nama'da i'ka'ne onahue' yane'. 'Urua'da megka'ne. <sup>7</sup>Opudere pai'da aratbut o'nika'apo. Menokapi' huadaka'da kika'dik mo'eapone. Batihuapokika'dik mo'ika'apone. Bayokika'dik mo'ika'apone. Donayo opudere ehue' ijika'apoy. <sup>8</sup>In ettone'a 'uru'huieḡada huasihua'j e'toḡada be'kutioyne. Do'taj huaso' e'kubarakka' ikkenda be'sihuaka'ne. <sup>9</sup>Do'hua aratbuttaj a'manopo'koreaya'po mo'nigbuey'uy. Meyapi' aya'da huadaribaya' kenpa' on'manbatia'pakika'apo kenda in ettone' megka'nigon on'manbatia'pakika'apo. Ken ettone'taj okkahuehue' o'nika'apo, buttida ijjay. —Jesúsa o'mana'uyate.

**Huakupete Judasa Jesústaj  
o'huatitotiakapo judío huairitaj.**

(Mt. 26.14-16; Lc. 22.3-6)

<sup>10</sup>Doce Jesúsen huamata'moneri o'nepo nogtiada Judas Iscariotea o'bakhua'uyate. Huakupete Jesústaj huatitotiak judío huairitaj a'batia'pakya'po o'bahuahua'uyate.

<sup>11</sup>Judas Iscariote huakupete Jesústaj e'huatitotiakta' o'paknok judío huairia kenda on'nopondepo on'durugpakpo, “huakupe bo'yokapone,” o'nona'uyate. Judas kenda o'peedepepo huaboa'da sacerdote huairitaj monig ijbayokapet o'nopoḡ'uyate.

**Kene'huaya' Jesúsere on'bape'uyate.**

(Mt. 26.17-29; Lc. 22.7-23; Jn. 13.21-30; I Co. 11.23-26)

<sup>12</sup>Pan biahue' fiesta huakkuru huame'noe ee'te kenme'noe oveja 'uhua Diostaj on'nigbatiarakika'uyate.

—¿Fiesta aypo a'bapeya'po meya' fiesta aypo manhuada'dik o'eapo? —Jesúsen huanigpeika'eria o'nona'uyate.

<sup>13</sup>Botta' huanigpeika'eritaj o'mana'po:

—Jerusalénoyo yan'hua'. Huabokereka huē'ey kosote e'tohua'te bo'huahuayapet. Yan'tahuati'.

<sup>14</sup>Keyoda e'kudte jak huataḡ'eritaj “Meya' adkorepen pan biahue' fiesta aypo doere do'hued huanigpeika'eri o'bapeapoy. Huamanmadika'eria oa'.” <sup>15</sup>Ken jak huataḡ'eri o'peedepepo jak kutayo huaboro' kiregyo bo'tohua'apone. Kutopa huabidda huahuadere bo'huahuayapone. Keya' fiesta aypo yan'manhuada'. —Jesúsa o'mana'uyatenok. <sup>16</sup>Botta'a o'nokhua'po Jerusalénoyo on'hua'po kenda Jesúsa o'mana'nig on'huahuay'uyate. Ken jakyo o'nehua'po fiesta aypo on'manhuada'uyate.

<sup>17</sup>E'sikde'te Jesús doce huanigpeika'eriene ken jakyo o'nokyepo <sup>18</sup>kutopate o'nepo on'bapepo, —Judío huairia do'taj kadarake'po opud nogtiada do'taj mo'bayokapone. Ke'na oro'ere o'bapenig'a. Buttida ijjay. —Jesúsa o'mana'nok <sup>19</sup>suhue'nada o'nunpo huaboa'da Jesústaj:

—Doapi' ijbayokapetpi'. —Noga noga o'nona'uyate.

<sup>20</sup>—Doceya' nogtiada doere pan o'oye'epo konigti plato' o'oye'e. Ke'na me'bahuaya'apone. <sup>21</sup>Konig Apagba'te men'timadoya'uyatenig do'taj mogka'apone. Ke'nanayo do'taj huairitaj o'bayokapo kentataj



ke'ponada o'ēapo. Pai'nanada o'nopo'unhuahuika'apo. Ke'na a'nen si'poehue' e'uywayo huadakda o'ēaynig'a. —Jesúsa o'mana'uyate.

<sup>22</sup>Ken on'bape'po Jesúsa pan o'badapdo, “dakiti Dios” ona'depo o'posakea'po o'bayoke'po,

—Yan'bape'. In pan do'hued huaso' o'ē. —Doce huanigpeika'eritaj o'mana'uyate.

<sup>23</sup>A'timon vino huamai'pu' o'toēpo “dakiti Dios” ona'depo o'bayoke'nok aya'ada on'may'uyate.

<sup>24</sup>—In do'hued mimi o'ē. Aratbuten dakhuea' e'ka' ijbakkahuea'apoy, huaboa'da ijjay. Opuđtaj a'manopoēaya'po ijbueydepo do'hued mimi o'hua'apo. Aratbuten dakhuea' e'ka' akkahueaya'po do'hued mimi o'manighua'apo. <sup>25</sup>Ona'ti vino mayhue' ijika'apoy. Nogok kene'huaya' do'hued Apag Dios Huairitaj aya'da huaknopō'eri huaboa'da Diosyo en'bahuade'te onte'ti vino ijmayapoy. —Jesúsa o'mana'uyate.

**“Jesústaj jokiahue'ya ijjey.” Bapaa' ia'apone Pedro, Jesúsa ona'uyate.**

(Mt. 26.30-35; Lc. 22.31-34; Jn. 13.36-38)

<sup>26</sup>Diostaj e'bata'dikea'de' Jerusalénya' o'norokdepo Olivos ote'yokon sikyo on'hua'uyate.

<sup>27</sup>—In sikyo opud aya'da do'taj o'nokmabiradapone. Do'taj o'nokmamonapone. Apagba'te kenpa' oa'nig konig: “Oveja huamatō'eritaj ekarakte oveja o'nokmamonapo.”

<sup>28</sup>Nogok huakudaka'da e'ēada ijnoyhuaddepo opudte Galileayo huakkuruda ijhua'apoy. —Jesúsa o'mana'uyate.

<sup>29</sup>—Nogomeya' bokbiradpo ekmamonpi' donayo okbiradhue' o'ēapone. —Pedroa Jesústaj ona'uyate.

<sup>30</sup>—Oyda in sikyo huatahuaj botta'a' sipoghued “Jesústaj jokiahue'ya ijjey.”

Bapa'a' ia'apone. Buttida ijjay. —Jesúsa Pedrotaj ona'uyate.

<sup>31</sup>—Ehue' onere bueydik eē'pi' “Jesústaj jokiahue'ya ijjey,” ahue' ijjeapoy. —Pedroa ihhua' ona'uyate. Aya'ada huanigpeika'eria konigti o'nona'uyate.

**Getsemaní ta'baya' Jesúsa Diostaj o'tiona'pakuyate.**

(Mt. 26.36-46; Lc. 22.39-46)

<sup>32</sup>Ken sikyoda Getsemaní ta'bayo Jesús huanigpeika'eriere o'nokye'uyate. —Inteda yan'bahuadti'. Ayo a'tiona'pakya'po ijhua'apoy. —Jesúsa o'mana'uyate.

<sup>33</sup>Pedrotaj Jacobotaj Juantere o'batohua'po huaboa'da suhue'nanada o'ēpo kenpa'ti pai'nanada o'nopo'ēpo,

<sup>34</sup>—Konig ijbueyapopo pai'nanada ijnopo'ey. Iyoda men'nige', doere yanokpoehue'. —Jesúsa o'mana'uyate.

<sup>35</sup>Nogiti adyonda o'hua'depo okkubuka' o'huedpo o'tiona'pakpo:

<sup>36</sup>—Do pai'da nopo'ehue' kaē'po tihuapokdik eē'nayo konig do ijpaknig kahue' yae'. Konig kenda on i'pak megka', do'hued pag. —Jesúsa o'tiona'pakuyate.

<sup>37</sup>Huanigpeika'eritaj o'bahuahuapo en'batayte o'bahuahuay'uyate.

—Menpa' i'tay, Simón. Nogoratipi' mena'po doere okpoehuehue'dik mo'ene. <sup>38</sup>Dakhuea' kahue' a'eya'po yanokpoehue' yan'tiona'pak. Huadak e'kika'ta' bo'eretpaknig'a kahue'dik mo'ene. —Pedrotaj ona'uyate.

<sup>39</sup>Onte'ti Jesús o'hua'po konigti huadik Diostaj o'tiona'pakpo <sup>40</sup>a'timon onte'ti once huanigpeika'eritaj o'bahuatiak'uyate. En'taytetion o'bahuahuayato'uyate. Taytaya' huakka' o'dapo kate a'tokhue'dik o'nuyate.

<sup>41</sup>Onte'ti o'bakhua'po o'tiona'pakdepo bapa'a' o'bahuatiakdepo,

—Oyitiēyo yan'huedti' yan'tayti'. Kenpa'da yan'tayde' oyda dakhuea'



huaka'eritaj do'taj me'bahuaya'ne.  
<sup>42</sup>Yan'mabo', mon'hua'. Ke'na  
 me'bahuaya'dene o'tiakde. —Jesúsa  
 once huanigpeika'eritaj o'mana'uyate.

**Jesústaj on'tohua'uyate.**

(Mt. 26.47-56; Lc. 22.47-53; Jn. 18.2-11)

<sup>43</sup>Ida Jesúsa kenpa' e'mana'ted  
 Judas okye'uyate. Jesúsen doce  
 huanigpeika'eri Judas nogtida o'uy.  
 Judasere huakka'da on'batiakbed'uyate.  
 Sorotata'en siro on'totiakpo noga  
 hueypa on'totiakpo on'batiakbed'uyate.  
 Sacerdote huairi Moisésenba'  
 huamanmadika'eri judío huairitone'a  
 on'mata'mona'nok on'batiakbed'uyate.

<sup>44</sup>—Kentaj bo'paknigtaj ijbuyukapoy  
 yan'tohuati'. —Kenpa' Judas  
 huabahuaya'eria tiakhued o'epo  
 o'mana'uyate. Jesústaj ka'nokie'po  
 kenpa' o'mana'uyate.

<sup>45</sup>Judas o'tiakdepo Jesústaj  
 o'huahuato'po,

—Ijtiaki, Huamanmadika'eri.

—Ona'depo o'buyukuyatenok <sup>46</sup>Jesústaj  
 on'takoyato'po on'tohua'uyate.

<sup>47</sup>Ken nogtida huanigpeika'eri siro  
 o'toepo sacerdote huairien huanaba'taj  
 o'pesodokteg'uyate.

<sup>48</sup>—Konig dakhuea' huabakbereeritaj  
 a'tohuaya'po mo'bahuahuika' konigti  
 do'taj on'huatiakbedne. Siro mo'toepo  
 hueypa mo'toepo do'taj on'huatiakbedne.

<sup>49</sup>Diosen jakyo aya' huame'noeda  
 ijhuadpo ijmanmadika'ikay. Kenoka'  
 do'taj tohuahue' o'nika'ne. Konig  
 Diosen huamanbatia'pakeria  
 Apagba'te mentimadoya'uyate konigda  
 opuda do'taj ka'dik o'nene. —Jesúsa  
 o'mana'uyate. <sup>50</sup>Kenda eade'te Jesúsen  
 huanigpeika'eri aya'ada Jesústaj  
 o'nokmamon'uyate.

**Huabokerek e'eqada okmon'uyate.**

<sup>51</sup>Huabokerek o'tahua'po yudtayo'da  
 nogtida kuperina o'kudopo o'tahua'nok

on'takoyato'nig'a <sup>52</sup>kuperina  
 o'matienonpo o'makmon'uyate.

**Judío huairi egkupopakyo Jesústaj  
 on'boa'uyate.**

(Mt. 26.57-68; Lc. 22.54-55, 63-71;

Jn. 18.12-14, 19-24)

<sup>53</sup>Jesústaj on'tohua'po sacerdote  
 huairitone'te on'tohua'uyate. Nog  
 sacerdote huairi, huairitone',  
 Moisésenba' huamanmadika'eri  
 ogkupopakuyate. <sup>54</sup>Pedronayo  
 adteda Jesústaj o'tahua'uyate.  
 Sacerdote huairitone'en kurute  
 o'tiakdepo e'tiokpaka'yo o'kudpo  
 policíasere o'huadonhua'po ta'ak  
 o'tihuadonhua'uyate.

<sup>55</sup>Sacerdote huairi nog judío  
 huairiere ogkupakdepo “Jesúsa  
 dakhuea'da o'ka'uy.” “Jesúsa nama'da  
 oa'uy.” Be'api' kenpa' a'huaaya'po  
 on'dikuk. Nogpa' nogpa' nama'da  
 a'huaaya'po kenpa'ti on'dikukpo  
 Jesús kabueye', ea'ta' o'deretpakuyate.  
 On'dikuknig'a dihuaahuayhue' o'nuyate.  
<sup>56</sup>Huakka'ada Jesústaj da on'huaa'nig'a  
 jondikyo' huaahue' o'nuyate. <sup>57</sup>Sue'ada  
 on'bopo da on'huaa'po:

<sup>58</sup>—“Diosen huid jaktone'taj  
 sardik ijje. Ken jak huabokereka  
 ogka'uyatenig. Bapa' huame'noe onte'ti  
 ka'dik ijje huabokerekapi' kahue'tada.”  
 Oro'omeya kenda o'peemey. <sup>59</sup>—Noga  
 kenpa' o'da'nig'a ondikyo' huaahue'  
 o'nuyate.

<sup>60</sup>Kenoka' nopoya'da sacerdote  
 huairitone' o'bodpo,

—¿O'na menpa' baa'tokhue' i'e?  
 ¿Kenda inomeya ontaj bohuaa'ne  
 buttida menpa' yada'? —Sacerdote  
 huairitone'a Jesústaj ona'uyate.

<sup>61</sup>Jesúsnayo soata' a'tokhue'da  
 o'uyate. Sacerdote huairitone' onte'ti  
 ona'po:

—¿O'na menpa' Cristo Diosen  
 Huasi'po i'e? —Jesústaj ona'uyate.

62—Ee', Cristo ijjeý. Diosen Huasi'po ijjeý. Diosa me'ta'mona'uyne. Dios teynanada o'ika'po kenere e'huadte kurudya' e'sihuiya' e'tiakte on'tiahuayapone. —Jesúsa sacerdote huairitone'taj ona'uyate.

63-64 Konig judío aratbuta on'diaypo ogkika'nig sacerdote huairi Jesústaj o'pepepo o'huadiayonpo yudtaj o'huis'uyate. Noga huairitaj o'mana'po:

—Dios ijjeý. Dakhuea'da oa'nok nog dakhuea' huaa'eritaj peehue'dik o'ey. Opuda mo'peede. ¿Menpa' mo'nopo'e? —O'mana'nok,

—Dakhuea' oa'. Bueydik kae'. —Aya'ada o'nona'uyate.

65 Jesúsen huakoktaj on'tisupu'e'uyate. O'nokpotidoka'po on'tuktukpo, —Yamadikka'. Yanopo'e' be'a be'tuktuk. —O'nona'uyate. Policíakon huakokta' on'tuktukuyate.

**“Jesústaj jokiahue'ya ijjeý.” Pedroa bapa'a' oa'uyate.**

(Mt. 26.69-75; Lc. 22.56-62; Jn. 18.15-18, 25-29)

66 Ken jak kurute Pedro e'huadte sacerdote huairien mune'yo huanaba'a o'tiakpo 67 ta'ak e'tihuadte o'tiahuaypo, —Jesús Nazaret huag'eriere i'huae'ika'uy. —Mune'yoa Pedrotaj ona'uyate.

68—Ehue' jokiahue'ya ijjeý. Katea' i'et nopoehue' ijjeý. —Pedroa oa'uyate. E'tiokpaka' akbogpeyo e'huade'te huatahuua o'sipoguyate. 69 Mune'yo huanaba' onte'ti o'tiahuaypo, —In huabokerek Jesúsen huanigpeika'eri nogtida o'e. —O'mana'uyate.

70—Jesúsen huanigpeika'eri ehue' ijjeý. —Pedroa onte'ti o'mana'uyate. A'timon Pedrotaj onte'ti nogomeyakon o'nona'po: —O'na Jesúsen huanigpeika'eri i'epo Galilea huag'erien hua'a ia'ne. —O'nona'uyate.

71—Kentaj jokiahue'ya ijjeý. Buttida ijjeý. Buttida ahue' ee'nayo dakhuea'da do'taj kagke'. —Pedroa o'mana'uyate.

72 Kenpa' ea'te huatahuua onte'ti o'sipog'uyate. E'sipogde'te “Huatahuua botta'a' sipoghued ee'ted do'taj jokiahue'ya ijjeý bapa'a' ia'apo.” Mename'nig Pedro huaboa'da onte'ti o'noponpo pai'nanada o'huikuyate.

**Jesústaj Pilato gobierno huairitaj on'yokuyate.**

(Mt. 27.1-2, 11-14; Lc. 23.1-5; Jn. 18.28-38)

**15** 1 Emede'te monig Jesústaj ka'dik o'ey sacerdote huairi huairitone' Moisésenba' huamanmadika'eriere on'batia'pakdepo Jesústaj on'tinukupo Romano gobierno huairi Pilatotaj on'tohua'uyate. On'yokuyate.

2—¿Judíoen gobierno huairi menpa' i'ie? —Jesústaj Pilatoa ona'uyate. —Ee' kenda ia' kenda ijjeý. —Jesúsa ona'uyate.

3—Jesús dakhuea'da o'e. Nogda nogda dakhuea' o'kame'. Nogda nogda dakhuea' o'ka'uy. —Sacerdote huairia o'nona'uyate.

4—¿Menpa' a'tokhue' i'ie? Ontaj huakka' dakhuea'da bo'huaa'ne. —Pilatoa Jesústaj onte'ti ona'uyate.

5 Jesúsanayo sigpi' baa'tokhue'da o'mauyatenok Pilato “kenpihuay” Jesústaj oknopo'e'uyate.

**Jesústaj yanarakti' Pilatoa ta'pota'da o'mana'uyate.**

(Mt. 27.15-31; Lc. 23.13-25; Jn. 18.38-19.16)

6 Ken fiestate Pilatoa nogtatida huabakuda' jakyo huag'eritaj o'maorokika'. Kentaj aratbuta o'baktie'ea'po o'orokika'.

7 Huabakuda' jakyo dakhuea' huaka'eri Barrabásere o'nepo gobierno huairitaj a'maenya'po on'barakme'te. 8 “Nogok nogok

fiestate nogtatida i'maorokika'nig nogtatida yaoroka'." Aratbuta Pilatotaj o'nona'nok,

<sup>9</sup>—¿Judíoen Huairitaj e'nigoroka'ta' menpa' bo'pak? —Pilatoa o'mana'uyate.

<sup>10</sup>Sacerdote huairi Jesústaj digda on'huahuaypo men'nigtotiakne. Pilatoa kenpa' o'nopondepo o'mana'uyate.

<sup>11</sup>"Barrabástaj yaoroka'. Barrabástaj yaoroka'." Pilatotaj ya'nona'. Sacerdote huairia huakka' aratbuttaj digda on'mana'uyate.

<sup>12</sup>—¿Judíoen Huairi opudomeya on'dikka'ika'nigtaj monig ijka'apo? —Pilatoa onte'ti o'mana'uyate.

<sup>13</sup>—Hueypa cruzte yaarak. —'Utta'nada o'nona'uyate.

<sup>14</sup>—¿Mena'po? ¿Kate dakhuea' yaka'? —Pilatoa o'mana'uyate.

—Hueypa cruzte yaarak. —Nogiti nogiti 'utta'da o'nona'uyate.

<sup>15</sup>Ken aratbuttaj o'manigpeepo o'pakpo Barrabástaj o'oroka'uyate. "Jesústaj huiyokda huasi'dakbi'a yan'bitbit" o'mana'depo hueypa cruzte kan'arake'po Pilatoa sorotata'taj o'bayokuyate.

<sup>16</sup>Gobierno huairien huaboro' jakyo on'tohua'depo aya'da sorotataj Jesústaj on'tikupopakuyate. <sup>17</sup>Jesústaj ayagda huaok on'ota'po (ken konig gobierno huairiayo'da on'otika'nig) kenpa'ti e'pid huakiok ogkuotta'po,

<sup>18</sup>—I'tiak, judío aratbuten gobierno huairi. —Sorotata'a dakhue'dikda on'nopepo 'utta'nanada o'nona'uyate.

<sup>19</sup>Kenpa'ti hueypa ogkubitbitpo on'tisupu'epo huikudate on'tihuaduyate.

<sup>20</sup>Ken konig on'tierikdepo okayagda o'nokiroka'po ke'nenokkon onte'ti on'ota'depo hueypa cruzte a'arakya'po Jesústaj on'tohua'uyate.

**Hueypa cruzte on'arakuyate.**

(Mt. 27.32-44; Lc. 23.26-43;

Jn. 19.17-27)

<sup>21</sup>Simón Cirene huakka' jak huae'eri Alejandro Rufoenere huaoj ta'baya'

o'tiakpo kenteda o'poknok "Jesúsén cruz tohua'dik i'ene," o'nona'uyate.

<sup>22</sup>Ken Gólgota ote'te on'tohua'uyate.

Gólgota aratbutenate huakuai' ote'te on'tohua'uyate. <sup>23</sup>Keya' sorotataj vino pai' on'yokuyatenig'a mayhue' o'uyate. <sup>24</sup>Sorotata'a Jesústaj cruzte on'betandepo be'ati ke'nen yudtaj ya'deyapet a'nopeya'po huid okmo o'nene'uyate.

<sup>25</sup>Sikyoedda nuevete cruzte on'beta'uyate. <sup>26</sup>Huaku kutapen hueymeyen "In judío aratbuten gobierno huairi o'e." On'madoya'uyate. Konigepo bueydik o'e on'nope'uyate. <sup>27</sup>Botta' huabere'eritakon hueypa cruzte on'mabeta'uyate. Jesús huada'kopen noga ope'topen on'mabetuyate. <sup>28</sup>"Dakhuea' huaka'eriye ya'bueyapet." Ken konig Apagba' oa'uyatenig Jesús o'buey'uyate.

<sup>29</sup>Judío aratbuta on'bapokpo Jesústaj dakhuea'da on'tidi'keonhua'uyate. Kenpa'ti on'huadiaypo huakua on'pekore'epo,

—"Diosen huaboro' jak ijsakapoy, bapa' huame'noe onte'ti ijka'apoy." Iame'ne. <sup>30</sup>O'na bueyhue' a'eya'po huata'da yatihuapokpo cruzya' yahuarak. —O'nona'uyate.

<sup>31</sup>Ken kenpa'ti sacerdote huairi Moisésenba' huamanmadika'eriye huayahua dakhuea'da on'huaa'po:

—Nogomeytaj o'bayarea'ika'uyatenig'a huata'nayo bueyhue' a'eya'po tihuapokhue'dik o'e. <sup>32</sup>Cristo judío aratbuten huairi kahuarake'. Kenda e'tiahuaynayo oknopoika'dik o'eapoy. Huabereeriye Jesús onteteyo' hueypa cruzte on'betpo kenpa'ti Jesústaj dakhuea'da ona'uyate.

**In konig Jesús o'buey'uyate.**

(Mt. 27.45-56; Lc. 23.44-49;

Jn. 19.28-30)

<sup>33</sup>Tokhuad e'huadte huadari huabada o'sikon'uy. Sikkiregda o'uyate. Terea'

e'huadde'te onte'ti o'ta'tuduyate.

<sup>34</sup>Kenteda niokpo e'huadted,

—Eloi, Eloi, ¿lama sabactani?

—Jesúsa 'utta'da o'okoyon'uyate. Ken aratbuten hua'ate: “¿Mena'po do'taj me'enonne? Do'hued Dios, do'hued Dios.”

<sup>35</sup>Sue'da huakka'mona on'tikupobopo on'peedepo,

—In huabokerek Eliaskudaktaj onokoy. —On'mana'uyate.

<sup>36</sup>Nogtida huabokerek o'ketonhua'po apon esponja vino pai'yo o'ta'buta'po hueypate o'beta'po kenpa'ti huakitta'te o'nigoktea'uyate. Kabuyuke'po o'nigoktea'uyate.

<sup>37</sup>Ken Jesús 'utta'da o'okoyondepo o'notitikon'uyate. <sup>38</sup>E'bueyonte Diosen huid jakyo konig tela pegtone' e'roya'da kutapen nopote o'huison'uyate. <sup>39</sup>Ken sorotataj capitána romanoa Jesúsokopen o'bopo o'tiahuaypo konig Jesús o'okoyonpo o'bueyonnigtaj o'tiahuaypo, —In huabokerek buttida Diosen Huasi'po o'e. —O'da'uyate.

<sup>40</sup>Kenpa'ti ettone' o'nepo bidta'da on'tiahuayanhua'uyate. María Magdalena o'epo kenpa'ti María Jacobo huasueden huaye José Saloméereen huaye o'nepo. <sup>41</sup>Jesús Galileayo ee'te on'tahua'ika'po kenpa'ti on'manigmanhuada'ika'uyate. Kenpa'ti nogomey ettone' huakka'mon bidta'da on'tiahuayanhua'uyate. Ke'na Jesúsere Jerusalényo on'huame'te.

**Jesústaj on'kubarakka'uyate.**

(Mt. 27.57-61; Lc. 23.50-56;

Jn. 19.38-42)

<sup>42</sup>Ken o'sikonyakuyate. Eme'te judfoen okmapie'ahuaddik huame'noe o'eaponok <sup>43</sup>José o'tiakpo me'pukhue' o'epo Pilatotaj o'huahua'po “Jesúsensó' beyok.” Ona'uyate. José Arimateayo huae'eri o'epo kenpa'ti

judfo huairi huakupopakyo huae'eri o'uyate. Kenpa'ti Dios Huairitaj daka' o'nigika'uyate. <sup>44</sup>Josétaj Pilatoa o'peedepo Jesús o'bueyde o'mepuke'po “¿menpa' ya'bueyonde?” capitántaj ona'uyate. <sup>45</sup>“Ee', o'bueyde,” capitána ona'denok Jesúsensó' Josétaj o'yokuyate. <sup>46</sup>Uruda tela huakupete oe'po o'so'huarakapo o'so'tihuiyig'uyate. A'timon huabo sipana'kogyo o'so'huedan'uyate. Kenpa'ti kubarak akbogpete huaboro' huida o'tinokbetan'uyate. <sup>47</sup>María Magdalena Joséen huaye Maríaere keyo o'so'hueda' on'tiahuay'uyate.

**Jesúsa huakudaka'da e'eada o'noyhuaduyate.**

(Mt. 28.1-10; Lc. 24.1-12; Jn. 20.1-10)

**16** <sup>1</sup>Judfo aratbuten okmapie'ahuaddik huame'noe epokonde'te domingo emede'te María Magdalena Salomé Maríaere Jacoboen huaye 'uru'hujeda huasihuaj huakupete o'depo Jesúsensó' aso'huekeya'po o'de'uyate. <sup>2</sup>Domingo emede'te kubarakyo on'tiakdep, <sup>3</sup>—¿Be'a kubarak huid huanokbet yakpokorea'apet? —Huayahuaaya on'batia'pakuyatenig'a <sup>4</sup>on'tiahuayato'po kubarak huid huanokbet onokbetahue' on'tiahuaypo, <sup>5</sup>kubarakyo on'kuddepo da'kopente huaboa bokerek huabid huaok yerenanada e'ottaj on'tiahuaypo on'mepuke'uyate.

<sup>6</sup>Okme'pukhue' mene'. Jesús Nazaret huae'eri kentaj cruzte o'darakme' bo'ukne. O'noyhuadde. Iyo ehue' o'e. Iyo on'huedame'te. Ehue' o'e. Yan'tiahuay'. <sup>7</sup>Yan'huati', ke'nen huanigpeika'eritaj kenpa'ti Pedrotaj ya'nona', “Galileayo huakkuru o'hua'apo. Ayoda kentaj bo'tiahuayapone. Kenda ijJay bo'tiahuayapone.” —Kenda huabo huabokereka ettone'taj o'mana'uyate.

<sup>8</sup>Ken ettone' kubarakya' o'nokmonpo digá'da onme'pukpo be'tapi' onbatia'pakhue' o'nyuate.

**Jesúsa María Magdalenataj  
o'tiahuay'ea'uyate.**

*(Jn. 20.11-18)*

<sup>9</sup>Domingo sikyoedda Jesúsa o'noyhuaddepo huakkuruda María Magdalenataj o'so'tiahuay'ea'uyate. A'nen Jesúsa siete nokiregtaj okmaena'uyate. <sup>10</sup>María o'hua'po Jesúsen huanigpeika'eritaj o'huahua'depo Jesústaj ijtiahuaydey o'batia'pakuyate. Kenomey suhue'nanada o'nepo on'bahuikpo. <sup>11</sup>Jesús onte'ti o'noe kenpa'ti María e'tiahuaydetada oknopoe'hue' o'nyuate.

**Jesús botta' huanigpeika'eritaj  
o'batiahuay'uyate.**

*(Lc. 24.13-35)*

<sup>12</sup>Nogok botta' Jesúsen huanigpeika'eri dagte on'hua'uyate. Jesús konig nogkokada o'epo botta'taj o'batiahuaydenok <sup>13</sup>Jesús o'e o'nokie'depo nog huanigpeika'eritaj on'bahuahua'po "Jesús o'noe," e'mana'tada Jesús o'noe nopoe'hue'da o'nyuate.

**Jesúsen once huamata'moneritaj  
o'mata'mona'uyate.**

*(Mt. 28.16-20; Lc. 24.36-49;  
Jn. 20.19-23)*

<sup>14</sup>Nogok once huanigpeika'eri aypo kutopate en'huadte Jesús o'manokyon'uyate. "Do e'noyhuadte

huakka'mon do'taj mentiahuaydete kenda e'tia'paktada o'noyhuad oknopoe'hue' mo'ene. Dakhue'da mo'ene." O'mana'uyate.

<sup>15</sup>—Aya'bayoda aya' aratbutte yan'huati'. Huadak hua'a yan'manbatia'pakikati'.

<sup>16</sup>Huaknopoe'eritaj bautiza egka'te Diosa o'manopo'yarea'apo o'manoeanhuahuika'apo, aya' oknopoe'hue' huae'eritaj Diosa castiga o'magkadhuahuika'apo.

<sup>17</sup>Do ijpaknok do'hued huadik ea'te huaknopoe'eria toto' nokiregtaj on'makmaoro'ka'ika'apo. Nog aratbuten hua'ate ona'pakapo.

<sup>18</sup>Bihuitaj on'paytoe'apo.

Mabokhue'dik o'e'apo. E'bueyuruhue e'maypi' bueyhue'dik o'neapo. Dakhue' aratbuttaj huaba'a on'tibata'teaponok on'bayarika'apo. —Jesúsa o'mana'uyate.

**Kurudyo Jesús o'behuikuyate.**

*(Lc. 24.50-53)*

<sup>19</sup>Ken Jesúsa kenda e'manade'te Diosa Jesús Huairitaj o'baktobehuikuyate. Diosen huada'kopen o'huaduyate.

<sup>20</sup>Huanigpeika'eria on'bahua'po nogyo nogyo aya'bayoda Jesúsen huadak hua'a on'manbatia'pako nhuahuika'uyate. Jesús Huairia huakka' o'batihuapokika'po Jesúsen huadak hua'a e'manbatia'pakte teyda o'batihuapoknok on'bayarea'po nogda ogkika'po konig Diosyo'da ka'dik o'enig ogkika'uyate, ken.